

Prominents dalla vischnaunca da Tujetsch

Rimnau ord Calenders Romontschs (1947 - 2006)

Sur Benedetg Venzin vegn numnaus protonotari apostolic
Sur G. Aluis Brugger (1871-1953)
Monsignor Benedetg Venzin,
President Gion Felici Monn, Tujetsch,
Ignazi Venzin, Selva,
Mistral Vigeli Berther, Tujetsch,
Lucas Berther, hotelier, Sedrun-Turitg,
President Christian Berther, Sedrun,
Scolast Tumaisch Venzin, Sedrun,
Maurus Berther, Sedrun,
Baseli Berther, Rueras,
Pader Alexander Beer,
Placi Jacomet,
Pader Vigeli Berther OSB,
Sur Flurin Venzin,
Toni Hendry, Sedrun,
Vigeli Berther, Sedrun/Camischolas,
Mistral Theofil Schmid, Sedrun,
Pader Placi Berther OSB,
Francestg Berther, Rueras (1906-2000),
Sur Giusep Berther, Dieni/Tujetsch (1916-2004);

CR 1947
Pelegrin Annada 54 nr. 7
necrolog, CR 1956
necrolog, CR 1956
necrolog, CR 1962
necrolog, CR 1965
necrolog, CR 1967
necrolog, CR 1967
necrolog, CR 1967
necrolog, CR 1967
necrolog, CR 1969
necrolog, CR 1971
necrolog, CR 1972
necrolog, CR 1976
necrolog, CR 1979
necrolog, CR 1981
necrolog, CR 1983
necrolog, CR 1989
necrolog, CR 1991
necrolog, CR 1994
necrolog, CR 2001
necrolog, CR 2006



Rev. sur Benedetg Venzin protonotar apostolic
CR 1947, pag. 41

Cun gronda legria han ton il clerus digl uestgiu de Cuera sco surtut il pievel romontsch udiu la legrevla nova, che nies reverendissim vicari general Gion Benedetg Venzin seigi vegnius numnaus da Ruma protonotari apostolic. Sch'il Calender Romontsch vul presentar il distinguu sacerdot dil Segner a ses lecturs ed a sias lecturas, ei quei zun ludeivel, pertgei sur Venzin ei in cauld amator dil pievel romontsch ed ha neu e neu fatg honur a quel.

El ei naschius il schaner 1892 sisum la Surselva, a Selva. Leu ha el passentau sia ventireivl'affonza. Da pign ensi ha el empriu de luvrar e barhar. Igl unviern mava el a scola e leu vegneva empriu. Finida la scola gidava el sil funs, mava magari la stad ad alp. Leu vevi el da buob fatg ina tala prova, ch' el fuvi vegnius schi grass e rodunds ch'ins strusch vesevi ils egls, tuttavia cu el rievi, quei che succedevi gia lu ualti savens. El ha denton nuota tralaschau ded arver ils egls, ha gia si Tujetsch empriu de dumignar las difficultads della veta muntagnarda. E quei ei stau bien per tut siu avegnir. Varghentai ils onns de scola primara ha il nunemblideivel plevon de Tujetsch sur canon Gudegn Engler cussegliu de schar studiar il talentus mattatsch. Las difficultads dils studis gimnasials ha el surventschiu levamein el collegi de Sarnen ed ei serendus, suandond il clom dil Segner, el seminari de S.Leci a Cuera. Beinenqual ei sesmarvegliu de quella viulta en sia veta, pertgei el udeva buca mo tier ils pli talentus, mobein era tier ils pli leghers denter ses conscolars, ed era perquei adina beinvesius en societad. El seminari de S. Leci ha el absolviu ses studis de teologia sut ils renomai professers mgr. Gisler, Niederberger e Mader. El ei senezigius de quels onns de studi per acquistar ina vasta savida ella scienza divina, per ella veta sacerdotala saver purtar quella viaden el pievel carezau. Il fenadur 1917 ha el celebrau sia sontga messa nuviala. Siu emprem post ei stau la pleiv de Breil. Cheu ha el luvrau cun fiug ed anim giuvenil dapi 1918-1932, el ver senn dil plaid in bien pastur, valent predicatur ed


educatur. Ei dat forsa strusch ina scantschala en Surselva dalla quala ano el vess buca perdegau al pievel e consolau e confortau quel cun premura sacerdotala. Beinduras menava el era la pleva e nus legin ton el «Tagblatt» sco ella «Romontscha» e surtut ella «Vusch dils Mats» ses artechels secrets e dictai d'ina vera carezia pastorala.

Nuota de smarvegliar che mgr. Luregn Matias d.p.m. ha clamau el a Cuera e designau el per successur de sur Caminada sco custos della catedrala de Cuera. Per Daniev 1933 ha el surpriu la greva pleiv de Cuera. E quel che veva da pign ensi empriu de luvrar e barhar e de dumignar las diificultads, ha fatg il medem a Cuera. Cuninaga ha el acquistau cheu la stema e carezia della populaziun entras sia premura, sia prudientscha e siu senn social. Igl ei enconuscent, ch'el ha suenter strusch treis onns baghegiu la biala baselgia dil Ss. Salvader a Cuera. Beinsavend ch'ils auters organiseschan nossa glied, sche nus tralaschein de far quei, eis el sepriu en per las organisaziuns de luvriers e luvreras e della giuventetgna. Ina immensa summa de lavur che mo quel sa apprezzar, che ha sez giu de far cun uniuns ed organisaziuns. Suenter la stentusa lavur dil di, serender la sera en in local e puspei leu menar la barca entochen viaden ella notg, ed adina porscher enzatgei che interessescha quella glied, quei ei lavur zun stunclentusa che damonda ferma gnarva e bien stumi.

Mo nies sur Benedetg vess aunc fatg dapli ella pastoraziun, sche mgr. Christianus vess buca clamau el sin in scalem aunc pli elevau e designau el per siu agen successur sco decan della catedrala e vicari general digl uestgiu. Sco tal ha el era prestau gronda e conscienziosa lavur ed ei oz il maun dretg de monsignur. Nus selegrein dacormein che mgr. Christianus ha fatg attents a Ruma sin quei meriteivz collaboratur, e che Roma ha buca targlinau ded undrar el culla distincziun la pli honorifica ch'ei dat sut il grad ded uestg. In pli dign deva ei strusch egl entir uestgiu.

Il Calender Romontsch e tuts ses lecturs gratuleschan dacormein al niev prelat e giavischan ad el aunc biars dis ed onns de robusta sanadad e prospereivel operar sin siu ault post.

J.C.



Sur fossa da revendissim sur canonì Giusep Aluis Brugger

Il meins vargau vegnan dus gronds amitgs ad esser s'entupai leuvi en la perpetnadad: Sur canonì Aluis Brugger ed il pader Maurus Carnot. Vivess lez aunc, savess el bein rapportar il meglier el Pelegrin in maletg da siu amitg defunct. Schegie cun entginas retenientschas, selubin nus tonaton da tarmetter in per lingias d'engrazieivla regurdientscha sur fossa da quei meriteivel e bien augsegner.

La via terrestre da sur canonì Brugger ei stada liunga, stentusa e zun fritgeivla. El ei naschius ils 5 da settember 1871 en tiara jastra a Messina en Sizilia ed ei vegnius cun miez onn a Rueras. L'entschatta dil gimnasi ha il talentus buob fatg en claustra a Mustér (nua ch'el ei staus scolar dil giuven pader Maurus) e concludiu quel a

Friburg. Il studiologic absolva el a Cuera el seminari da s. Leci. In cuort temps anflein nus el aunc all'universidad da Löwen, nua ch'el ei vegnius en contact cun cardinal Mercier. En relativamein paucs onns da scola, acquista il defunct ina gronda savida en fatgs da filosofia e teologia. Cun quellas pussentas armas ei Sur Brugger staus a siu temps in da nos emprems exponents el combat dallas ideas sut l'egida dil renomau «liun» da Trun dr. Casper Decurtins. Cunzun el combat per la scola cristiana ha el gizzau savens e cun success la pleva e mussau da tgei spért ch'el era.

En emprema lingia han denton buca quellas caussas fatg quei spiritual aschi gronds, meriteivels e beinvesius. Sper sia lavur scientifica, che tut sto renconuscher; possedeve el ina tut speciala carezia per Diu e per las olmas. Quella carezia, che haveva sias ragischs el spért profundamein religius da quei um pietus, ha menau el la via ch'el ei ius.

Entschiet ha il defunct sia carriera a Rueras da buob sco sempel paster, caver e nurser. Sto esser ch'el haveva, ina certa predilecziun per la clamada da pastur. Ils vegls raquentan aunc oz, ch'el hagi giu scret sco giuven student en in da ses frusts cun las panuglias-risdiv ils significonts plaids: «Jeu vegnel augsegner!» Quei sogn ideal animava pia gia da lezzas uras siu spert e muentava siu cor. El ei lu veramein vegnius augsegner ed in bien augsegner. Dus dis suenter sia messa nuvia ha il msgr. uestg tarmess sur Brugger en la pleiv gronda da Trun (1895-1912). Suenter arriva el a Mustér e pastorescha quella greva pleiv varga 30 onns. Igl onn 1921 vegn el numnaus canonì en renconuschientscha da ses gronds merets. Da biars onns eis el era staus vicari episcopal dalla Cadi. Entgins dils davos onns entupein nus Sur can. Brugger sco spiritual dil spital a Glion. Lu tuorna el a Mustér tier ses buns

parents e parochians per concludar siu viadi terrestres ils 11 da zercladur 1953. Las restonzas terrestras ruaussan el santeri da Tujetsch.

Mo Niessegner sa, con ch'il car defunct ha prestau, unfriu e meritau en quels 82 onns da sia veta ed en ils 58 onns da siu sacerdozi. Nus savein allegar mo entgins muments da siu operar. Tgi che ha enconuschiu empau Sur can. Brugger, senuspescha da scriver bia, perquei ch'ei maunca ils vers plaids per exprimer quei, che l'olma senta. El ei buca staus in um da bia plaids e grondas bahaultschas. Sco in'umbriva passava el speras vi e ses plaids tunavan aschi migeivel e solemn sco sch'els vegnessen ord la perpetnada. Ins senteva, ch'el era in augsegner, che capeva da seconversar cun Diu e che saveva, ch'ei datti en la pastoraziun mai in ver success senza igl agid da surengiu. Sia buontad era buca fleivleza e sia pazienza buca negligentscha. El fuva in um dall'oraziun, che saveva spitgar, che leva mai stizzar la brastga sil lamegl e che capeva da consolar sco mo quel capescha, che senta en sesez la miseria da siu concarstgaun. Mai encureva el sesez e siu cor era prompts d'unfrir tut per gidar ils auters. Clars en sias ideas, perschuadius dalla verdad e da ses principis, fideivels a siu ideal sacerdotal, humiliteivels en siu operar, stuein nus ammirar quei bien survient dil Segner, che ha operau ton pil salit dallas olmas immortalas. Dieus datti ad el il ruaus perpeten!

Sur Giusep Durschei

En Il Pelegrin Annada 54 nr. 7, fenadur 1953, pag. 146



Monsignor Benedetg Venzin 1892 – 1955

CR 1956, pag 60

Ils 16 d'uost han il tuchiez della catedrala e, tenor veglia isonza, il zenn grond de S.Martin, purtau viadora alla populaziun de Cuera la tresta nuvia, che monsignur Benedetg Venzin, decan dil capetel catedral, seigi morts. Ina mort prematura haveva clamau la sera avon el, igl anteriur vicari general de nies uestgiu, vi tier Nessegner. Ei pareva in mument strusch pusseivel che quella statura aulta, robusta e franca hagi stuiu suttacumber aunc ella stad della veta ad ina dira e criua malsogna. Il december 1952 havevan las gasettas dau novas che msgr. Venzin seigi seretratgs dagl uffeci de vicari general. Ina paralisa, che era s'opponida a tuttas tentativas ed a tuts sforzs dils miedis, haveva ligiau el vid il letg ed isolau el da siu extendiu camp de lavur. Dall'entschatta enneu era quella cumpignada da grevas dolurs, che han consumau plaunet, el decuors de tschun onns, tut las forzas dil malsau. Cun la persuna de msgr. Venzin ha la diocesa piars in superiuor fetg prezziau e capavel, la Surselva in de ses pli prominents augsegners.


Sur decan Venzin ei naschius ils 13 de schaner 1892 a Sutcrestas, il vitg d'unviern de Selva, ussa disfatgs. Sia casa nativa sesanflava paucs pass sur la caplutta de Nossadunna digl Agid, igl allontanau e tgeu sanctuari de pelegrinadi de Tujetsch. Il bab, Vigeli Venzin, fageva il pur sco tuts el pign vischinadi. El ei morts fetg baul, aschia ch'ei ha tucbau alla mumma, Rosa n. Simonett de Casura enta Medel, d'haver persula il quita per la numerosa famiglia. Senza seschar scuraschar ha ella priu sin sesezza la dubla lavur e responsabladad, sefidond dil Segner. Ed il Segner ha gidau. Igl ei iu bein. Il tschiel ha schizun tarmess ina benedicziun tut speciala en famiglia, clamond il feigl Benedetg al sacerdozi. Sur Gaudenz Engler, il plevon de Sedrun de lezzas uras, haveva entruidau il svegliu ed intelligent scolar al collegi dils paders benedictins a Sarnen. Leu ha il Benedetg battiu l'entschatta cullas difficultads de mintga student romontsch. Igl ei denton buca iu ditg, ch'el marschava, ensemen cun in amitg, alla testa della classa. El era in student spir veta e forza, activs en scola e leghers en cumpignia, bugen vesius da tuts. Sco fervent commember dell'Uniun studentica svizzera ha el presidiau la Subsylvania e pli tard, a S.Glieci, la Renania, la Curiensis ded oz. Per ils davos onns de Sarnen ha el enconuschiu endretg la clamada sacerdotala en siu intern. Suenter ina oreifra matura va el, igl atun 1914, a Cuera el seminari. Monsignor uestg Georgius ordinescha el spiritual treis onns pli tard, ils 22 de fenadur 1917. Il di de messa nuvia a Sedrun ei stau in di d'intima legria per el, per la mumma ed ils ses e per gl'entir pievel tujetschin. Ei haveva, per allegar en quei connex, dau avon la messa nuvia de sur Benedetg Venzin tschun onns ora negina messa nuvia en tiara romontscha.

38 onns ha sur Venzin astgau survir al Segner sco spiritual. Ed el ha fatg quei senza reserva, cun gronda carezia per la pastoraziun e promtezia per tut las incumbensas de ses superiurs. Dall'entschatta enneu han quels demussau viers el gronda confidanza. Nus vesein quei dal fatg, che monsignur uestg tarmetta el gia dal seminari sco plevon el grond vischinadi de Breil. 14 onns pastorescha sur Benedetg quella pleiv. Ils parochiants de Breil vegnan strusch ad emblidar ton spert lur anteriur augsegner. Sur Venzin era in plevon popular, in valent predicatur, in habel mussader en scola ed in menader della giuventetgna, in prudent cusseglader ed in bien pastur dils malsauns. Ses priedis e las diversas publicaziuns de lezs onns demuossan in bien senn per l'istoria e carezia per la tradiziun religiosa romontscha. Per satisfar ad in grond basegns de nies pievel haveva el priu a mauns, cuort avon che vegnir clamaus a Cuera, l'ediziun d'in niev legendari. Ina lavur vasta e minuziusa, che sur Balzer Pelican, plevon a Dardin, ha lura continuau, mo deplorablamein buca pudiu finir avon sia mort. La stad 1932 cloma monsignur uestg Luregn Mathias sur Venzin el capetel catedral sco canoni residenzial e surdat ad el la pleiv de Cuera. Ils dus decennis, che sur canoni Venzin ha operau a Cuera, ein stai trasatras onns de stentusa lavur. Igl onn 1935 ha el baghegiu la baselgia dil Salvader. Ina premura e vigilanza particulara per la casa de Diu muossa buca mo quella gronda ovra, mobein remarkan ins tras tut siu sacerdozi. Aschia ha el gia si Breil renovau il chor ed ils altars della baselgia parochiala e dellas capluttas. Cun bien maun ha el pli tard, sco vicari general, empalau ils sforzs dils catolics spatitschai ella diaspora, nua ch'ei settractava de finanzia ed ereger ina nova baselgia. Igl ei buca il davos siu meret che l'unfrenda dil giubileum en favur dil seminari ei stada gronda ed ha era lubiu la restauraziun della veglia e biala baselgia premonstratensa. Cu Selva, siu vitg patern, al qual el era attaschus cun tut cor, ei daventaus in'unfrenda dellas flommas, ha el collectau e rimnau per la plascheivla baselgietta, che sesaulza oz sur il niev Selva, la summa de varga 30'000.- francs. Sur Venzin ei sededicaus ella pleiv de Cuera bia allas uniuns parochialas. 14 onns eis el staus president della scola dil »Hof«. Siu beinvuler e sia maniera concilianta fagevan el beinvesius e stimaus era tier persunas ed instanzas d'autra confessiun.

Il december 1941 daventa el vicari general. Sia liunga experientscha, ses duns, sia constituziun ferma e sauna, sia energia e siu maun speditiv havevan fatg ded el il spiritual ordvart qualificau per quei uffeci. Bunamein diesch onns eis el staus il fideivel gidonter de monsignur uestg Caminada ell'administraziun della vasta diocesa de Cuera. Igl onn 1946 ha papa Pius XII numnau el protonotari apostolic. Nus vulein en quest liug buca emblidar sia collaboraziun en favur della caussa romontscha. Endisch onns eis el staus per la Romania ella suprastanza della Liguria Romontscha.

Il december 1950 ha ina tragica sort mess el sil letg de malsogna, ch'el dueva buca bandunar pli. Gest el, il luvrer nunstunclenteivel e sin grev post, ha Niessegner clamau agl apostolat dil pitir. Igl ei stau sco la lavur in apostolat en survetsch della sontga baselgia. La sera de Nossadunna d'uost, sia fiasta preferida, eis el, il veneratur de Nossadunna, il pelegrin de Lourdes a Ziteil, spartius ella pasch dil Segner. Siu tgierp ruaussa ell'umbriva dil venerabel dom de Cuera. El possi esser arrivaus, nus augurein quei ad el, ella ventira de l'autra veta senza suffrir. Il viandont denton, cunzun ord tiara romontscha, che passa sper sia fossa frestga vi per entrar ella catedrala, datgi ils plaids de s. Paul: »Seregurdei de vos superiurs, che han annunziu a vus il plaid de Diu« (Hebr. 13, 7).

G. P.



President Gion Felici Monn, Tujetsch

CR 1956, pag. 53

Sin fossa ded in bien amitg astgan ins buca schar crescher pastg memi spert. Perquei seregorda il Calender Romontsch en pietad dil car e fideivel defunct president e deputau Gion Felici Monn. Naschius ils 16 de mars 1876 a Zarcuns, Tujetsch, fegl de stalter Martin Felici Monn e Marionna Catrina Hitz, ha il svegliu e frestg mattatsch frequentau la scola primara a Camischolas ed ei lu serendus 1890 en claustra a Mustér per far la preparanda ed ina classa reala. Igl onn suenter concluda el la scola reala a Sviz e tuorna mo nuidis a casa, perquei ch'el havess giu dun e talien d'emprender latin. Siu bab ei buca de siu meini. Lez haveva mo quei fegl (sper ina feglia) e quel leva el mantener per siu bi menaschi puril. Sch'il fegl tulenava, scheva il bab magari: »Dus dis hai jeu era empriu latin«. Cun quei fuva la discussiun

finida. Il Gion Felici ha obediù ed ei daventaus in pur de vaglia, che capeva e carezava sia clamada. Obedend a siu bab ha el era desistiu pli tard de far carriera militar, ch'el havess giu la pusseivladad de far.

Anno 1901 eis el maridaus cun la giuvna Maria Nesa Cavegn de Sedrun ed ei lu secasaus a Camischolas. Quella ha schenghegiu ad el 5 affons, mo già il december 1908 eis ella morta. Ina greva frida. Dus onns pli tard marida el la vieua Anna Maria Riedi-Cavegn. Dieus benedescha el aunc ina ga cun 2 affons. Igl ei stau ina ventireivla letg, mo era quella dunna e schizun entgins dils affons ha Niessegner clamau avon ch'el. Quellas uras de dolur e tristezia ha il car defunct purtau el spert de vera resignaziun cristiana.

Sper siu menaschi puril ha el fatg peda de survir da giuven ensi alla vischnaunca ed al cumin. Igl onn 1903 han ins eligiù el geru e 1907 schizun president de vischnaunca (1907-15 e 1929-35). In tschuppel onns eis el staus derschader de cumin e derschader districtual ed entginas periodas era deputau dil Cussegl grond. La vischnaunca de Tujetsch ha d'engraziar in bionton a sia iniziativa e lavur. Cheu anflein nus il Gion Felici sco iniziand dell'ovra electrica de Sedrun, ch'el ha presidiau buca meins che 27 onns (1918-1945). Biars onns ha el era luvrau en la suprastanza dil consum liber ed en autras societads.

Mo tut quei dat buc in maletg cumplein dil defunct. Sper il quitau per sia carezada famiglia e sper la nunstunclenteivla lavur sociala per quei e tschei intent, ha el impundiù biaras e bunas uras per caussas puramein idealas. Tgi less descriver con temps ch'el ha sacrificau per las differentas uniuns, sco commember d'honor dil chor viril e della societad de musica e cun mussar teater. Cheu fuv'el propi en siu element. Aunc en ses vegls dis s'interessava el passionadamein dil teater ed insumma della cultura romontscha. Da giuven ensi eis el s'occupaus reguladamein dil lungatg, tradiziun e cultura de nies pievel, ha translatau teaters, raquintaziuns e novellas, ch'ei per part cumparidas en nos organs (Pelegri, Calender Romontsch, Gasetta Romontscha) e ch'ei per part restadas manuscret. Entiras notgs ora pudeva el leger e scriver de quellas caussas senza neglir sia lavur quotidiana. Per quei anflein nus forsa strusch in secund, ch'enconuscheva la tradiziun ed il lungatg tuatschin meglier ch'il deputau Gion Felici Monn. El scriveva e plidava in lungatg genuin, marcant e sonor e seturpegiava mai de sia viarva ni avon jasters ni dumias. La mumma romontscha ha piars cun el in de ses megliers amitgs, in ver idealist e fideivel combatant.

Tgi che ha enconuschiù il car defunct sa era, che quel ei staus in um de profunda cardientscha e religiusadad, in um gest e sincer, ch'era prompts de defender la giustia avon mintgin ed in um de bien cor, che ha gidau biars cun ovras e buns cussegls. In tal um mereta, ch'ins mantegni el en buna regurdientscha. Avon in onn, ils 11 d'october 1954 ha il Segner clamau siu fideivel survient tier l'armada gronda, nua ch'el ha segiramein anflau in buntadeivel derschader, pertgei ils davos onns de sia veta ein stai umbrivai d'ina greva e lungurusa malsogna. Possi il carezau amitg guder ussa la glisch dils beai per pagaglia de tut quei, ch'el ha prestau e suffriu duront siu lung e fritgeivel viadi terreste! G. D.




Ignazi Venzin, Selva

* 11 d'avrel 1936 - † 15 d'avrel 1961

Ina jamna da lavur era puspei ida da rendiu, ed il di da ruaus ed oraziun s'approximava, che la mort ha terminau cun furtina il viadi terreste d'Ignazi els onns d'ina giuventetgna plein speronzas e curascha. Puspei ei il human perdetga, che Sirach ha aunc oz raschun sch'el admonescha già el veder testament: «Patratga, che la mort targlina buc». Era Ignazi ei daventaus l'unfrenda dallas numerusas disgrazias dil traffic sin via. Era el banduna sur ura ses cars da casa e tuorna buca pli sil plaz da lavur. Cun premura havea el frequentau avon paucs meins las devoziuns e tedlau ils priedis dalla sontga missiun. Tgi havess detg che quella missiun culla devisa: «Salva ti'olma», vegni ad esser l'ultima preparaziun pil viadi ella perpetnadad! Ignazi ei spartius anetgamein e ha fatg da saver, ch'ils dis dalla veta humana ein gleiti dumbrai.

(Giuvens romontschs sparti memia baul da sur S.Berther, Breil; CR 1962, pag.57)



Mistral Vigeli Berther, Tujetsch 1878-1964
CR 1965, pag.67

«Gl'ei stabiliu ch'il carstgaun hagi inagada da murir.» Quels plaids ein puspei severificai inagada dapli culla mort da mistral Vigeli Berther, ch'ha concludiu il terrester cull'alva dil di della mesjamna digl emprem fenadur 1964 e rendiu si'olma al scaffider.

Cun mistral Vigeli Berther svanescha ina marcanta ed originala figura ord in da nos vitgs romontschs. Il defunct ei naschius 1878, ils 20 da settember, egl amureivel vitget da Camischolas, sco secund affon dils geniturs Duri Battesta Berther e Culastia, nata Monn. Ses geniturs ein denton beingleiti setratgs el vischinont, idilic uclaun Zarcuns, nua ch'els possedevan era casa e funs. Ensemblamein cun sia suletta sora Barla Tresa, pli tard consorta da signur president Gion Andriu Berther p.m., ha il defunct gudiu cheu ina biala affonza en relaziuns purilas. La scola primara, da lezzas uras sut la bitgetta de scolast Sigisbert Monn, Mustér, frequenta il defunct sco tut ils auters affons sis onns a Camischolas. Suentar tarmettan ses geniturs il giuven Vigeli alla scola claustrala a Mustér, nua ch'el absolva 1891/92 la preparanda e 1892/93 l'emprema reala. Igl onns 1893/94 anflein nus nies Vigeli el collegi s. Michel, Zug, nua ch'el seprepara per sia futura clamada purila per la quala el ha adina giu ina tut apartia affecziun. Suentar vegn il frestg giuven a casa e fa il pur cun ardur sil fatg puril da ses geniturs. Il defunct era gia en ses giuven onns in capavel pur e bien luvrer. El haveva che tagliava bein e siu canvau era lads.

Gia igl onn 1900 miera sia cara mumma, aunc buca fetg veglia, laschond anavos ina gronda largia. Entgins onns suenter banduna era la sora Barla Tresa il bab ed il frar per entrar el stan matrimonial. Bab e feagl eran ussa persuls sil bein puril. Empau cun fumitgasa, empau senza va quei tochen igl onn 1908, nua ch'il giuven Vigeli sespusa culla giuvna Marta Flury, feglia da Carli Flury, Segnas, ch'ei stada ina fideivla e premurada consorta. La letg ei stada benedida da buca meins che tredisch affons: nov fegls e quater feglias.

L'educaziun ed il quitaun per lur affons mava als geniturs oravon a tut auter. Schegie ch'ei era buca adina lev cun ina aschi gronda famiglia ein els buca senuspi da purtar enorms sacrificis per la formaziun e scolaziun da lur affons. Ils conjugals ein el decuors terrester tuttavia buca stai preservai da cruschs e travaglias. Buca meins che sis da lur cars affons han els stuiiu accumpignar sin santeri.

Gl'emprem ei morts sco affon pign. Il secund, la frestga mattatscha, Filomena, ei morta 1929, da 15 onns, raffada naven d'ina maligna malsogna. Il mars 1933 miera il tafer giuven Duri, il vegl dils affons ella vegliadetgna de 22 onns. Puspei, pign interval suenter, il fenadur dil medem onn sedisgraziescha il feagl Felici, seminarist negaus fagend bogn el lag da Hallwil, mo 17 1/2 onns vegls.

Il tschunavel dils affons ch'ils geniturs ston puspei dar sco tribut al Segner ei in auter feagl: dr. iurist Carli maridaus Gendre. Fagend in'excursiun el alp Nadels, Trun, vegn el anetgamein surprius dalla mort, ils 31 da fenadur 1948, mo 35 onns vegls.

Quellas fridas d'in nausch destin supportan ils geniturs en resignaziun cristiana. Nuotatonmeins laian ellas lur lastridas e sgurdineschan tier la greva lavur oravontut la sanadad della mumma che miera gia cun 67 onns, igl onn 1952.

Il temps spira e medeghescha plaun plaunet las plagas. Finalmein marida il davos feagl Gebhard, ed il vegl bab ei fetg cuntents da saver surdar siu fatg puril, acquistaus cun breigia e fadigia ad in dils ses. Cun tschaffen e curascha surpren Gebhard la bitgetta dil puresser ed il bab ei leds da saver far sera sontga. Dals 13 affons resta aunc la feglia Culastia che sedecida da star ed haver quitaun dil bab, quei ch'ella fa cun tutta carezia. Mistral Vigeli Berther pareva ussa da guder ina biala sera della veta. La providientscha veva denton aunc semtgau ina nova emprova. Gebhard, il feagl che veva surpriu il fatg puril, miera tut anetgamein ils 29 da mars 1963 e spazza las speronzas ch'il vegl mistral veva tschentau sin el. Ella vegliadetgna da mo 39 onns sto el bandunar la cara consorta e ses dus cars affonets.

Mistral Vigeli Berther ei buca mo staus in excellent mariu e bien bab per sia gronda famiglia; el ha sper il quitaun per la famiglia e siu considerabel fatg puril aunc administrau exemplaricamein differents uffecis en vischnaunca e cumin, da maniera che ses superiors savevan buca far auter che spender cumplein laud.

Beingleiti ein ils vischins en vischnaunca vegni allerts della formaziun da character e habilitads spirtalas dil giuven Vigeli. Gia cun 27 onns vegn el eligius cassier da vischnaunca, da lezzas uras «statalter». Da questa scharscha s'avonza el sco gerau da vischnaunca per plirs onns. 1923 confida la vischnaunca ad el il mandat da president communal, ch'el administrescha sis onns.

Era el cumin vegn president Berther enconuschantas e fa carriera. Secomprovaus dus onns sco deputau dil Cussegl Grond surdat la tschentada da cumin al defunct gl'uffeci della mistralia. Durent quater onns sa el applicar cheu siu clar patratg e siu saun spert giuridic.

Da 1933-1949 administrescha Mistral Berther il buca lev uffeci da president tutelar della Cadi.

Igl uffeci civil da sia vischnaunca diregia il defunct da 1909-47. Grazia all'excellenta scartira da Mistral Berther vegn el eligius uficial dil register funsil gia 1906. Quei difficil uffeci administrescha el entochen 1962, pia 56 onns.

1944 anflein nus el denter ils fundaturs della Cassa da Raiffeisen, la quala el presidiescha entochen 1960. En vesta a ses merets ha la Cassa da Raiffeisen eligiù el per president d'honor.

Era ei il defunct staus revisur da quen della cassa da malsauns Cadi e quei buca meins che 39-40 onns, nua che ses survetschs eran zun apprezzai. Resumein nus tut la lavur prestada dil respectau defunct stuein nus surstar. Bein era mistral Berther ina natira robusta el haveva retschiert dal Scaffider, sper ina sanadad da fier, aunc auters buns duns. El ha luvrau cun quels ed acquistau ulteriurs. Mo aschia eisi stau pusseivel da prestar tons survetschs al generaleesser, malgrad sia mudesta scolaziun.

Avon ina retscha d'onns vev'il defunct dau giu tut ses uffecis. Per el era ei sera, gleiti notg. Ussa sededicava el mo pli all'emprema part da sia devisa: «Ura e lavura». Quasi mintga di serendeva el a Sedrun a messa ed al baun della sontga communion. Mistral Berther ei aunc il di avon sia mort staus a messa e funcziuns da bara, cun caschun della sepultura da nossa preziada convischina Maria Constanzia Loretz e retschiert Niessegner durent messa. Aschia ha el detg per sesez sin santeri igl usitau paternies che vegn recitau «per igl emprem che suonda». Cull'alva da l'auter di ha il Segner gia clamau el.

Mistral Berther era gl'um che veva mai fuolas - peda ha tgi che pren -. El anflava adina temps da scumiar in per plaids cul concarstgaun en siu enconuschant saun humor, ne magari era da cargar ina buna pipa e far ina pli liunga discuriada. «In um senza humor ei buca in um», veva el per moda da dir. In bien amitg ed um renconuschiu en ed ord vischnaunca ei buca pli. Igl emprem venderdis dil meins, ils 3 da fenadur ha in impossant conduct da bara accumpignau nies vegl mistral alla fossa. La suprastonza communal, in numerus diember da convischins, hosps d'ordeifer e numerus representants dellas vischnauncas e politica han dau ad el la davosa honor. Bials ed edificonts ei staus il requiem dil ludeivel chor-beselgia, commuentonts e consoleivels il cant funeral dil chor mischedau. Omisdus chors han priu dign comiau da lur commember d'honor. Cunzun sesentin nus intimai da menziunar il bi riug da nies rev. sur plevon Giusep Durschei, che ha cun paucs plaids circumscret la persunalitad da mistral Vigeli Berther, in um d'oraziun e lavur.

En num dil cumin della Cadi plaida sgr. mistral regent, Hermann Lutz, Curaglia. En in bi plaid da bara seregorda el dils gronds merets dil defunct en general ed en special pils survetschs prestai el cumin.

Per nus che vein enconuschiu e viviu cun il defunct eis el staus in exempel d'oraziun e lavur.

Vegli il Tutpussent remunerar Tei per tut Tias lavurs e stentas e nus clamein tier a Ti: «Ruaussa en la pasch dil Segner, vegl bien amitg, ed a bien seveser en in meglier mund!»

Probabel tress il defunct la schuiala, legend el quest siu necrolog e schess: «Mu, quai vess tuttavia bétga fatg basegns, e gida, gid'ai per lura snuaivel pauc!»

Il defunct mistral pudess haver ina certa raschun R.I.P.

Gion Antoni Beer



Lucas Berther, hotelier, Sedrun-Turitg

CR 1967 pag. 64

In encarden solitari agl ur dil marcau, il santeri Manegg ella periferia da Turitg, in tschancun sur Wollishofen. La damaun dils 28 da december a bunura semovan differentas cudrias bunamein in tec schenadas ed jastras digl ambient singular atras las retschas da fossas viers la frestga ed aviarta. La plipart dil til ei buca leva da metter a casa. Umens e femnas giud la muntogna ch'ei vegni aposta per render honor al preziau e car e grond defunct Lucas Berther.

Ina plievgia spessa misla oragiu dalla cullina. Forsa ch'il spartiu vess desiderau in'autra sceneria. Empei da salischs penderli e hazers ruvers il culeischen e la draussa e forsia las caglias da garnedels. La fisionomia ei buca da casa, jastra ed atgna l'entira procedura dils fulnerals.

Nies davos dialog cul defunct ei staus purtaus d'ina gronda tensiun. La risposta hai jeu sminau e resentiu vivamein. Da mai vegnir unfis da far paleis la bellezza da sia patria siaden els cuolms.

In bi ed edificont riug da bara. Dil portret designaus cun manonza retenin nus il suandont.

Lucas Berther ei naschius ils 26 d'uost 1890 a Mustér sco emprem affon da Placi Berther ed Eleonora nata Cavegn. Ses geniturs vevan il hotel dalla Cruna a Sedrun. El ravugl d'ina gronda famiglia da nov affons passenta el in'affonza sulegliwa, carteivel saziada d'ina ferma realitad, in'ierta preziosa plitost davart dalla mumma. Suentar ver frequentau la scola claustrala a Mustér, serenda il mattatsch svelto ed energic a Turitg per far el hotel Baur au Lac igl emprendissadi da camerier.

Ed in albergatur da vaglia maungla saver empau ils lungatgs. Lucas Berther tila a nez ils onns da giuventetgna, va ell'Engheltiara, a Paris ed a Vichy. El fuss carteivel aunc staus pli ditg, sche la mort prematura dil bab vess buca clamau il feigl grond a casia. Cun tschaffen e premura semetta el a pèr cun la mumma e meina cun success il hotel dalla Cruna.

Eruir enzatgei reschniev, slargar las purteglia enten scuvierer las bellezias dalla natira ed envidar ils jasters da vegnir ella muntogna a serecuvrar. Buca mo ina prima cuschina, ei ha tuccau da presentar ulteriuras caussas alla clientella. Sco um dalla novaziun e dil progress ha el oravontut destadau igl interss per il sport da skis, per in'unione da cura e traffic e per in'ovra electrica a Sedrun.

Per in'activadad rasanta sco il Lucas Berther veva corrispundeva la limitaziun al pei dil cuolm mo per part. E dasperas fuvan ils fargliuns pli giuvens che dumignavan detgavunda il menaschi. - Ils anno vegn entupein nus el sco restauratur a Glion. Suentar entgins onns seretila la giuvna letg, il Lucas era dafertontier maridau cun la giuvna Alexandra Pajarola, cun la sora Tina a Turitg, nua ch'els sorprendan dus restaurants dall'emprema classa. Ils onns da Turitg ein stai per el d'in enorm avantatg. Biaras e bunas enconuschientschas ein semantenidas ina vet'ora. La giuvna consorta sto murir. Ina greva frida pil mariu che veva saviu sedecider per cun 36 onns d'entrar el stan matrimonial. Ed en in semeglient menaschi sco el veva, muncava la dunna dublamein. In onn sissu marida el per la secunda ga. Ella persuna dalla giuvna Pia Maetzler veva el tscharniu ina stupenta femna ch'ei stada agli ina consorta sco ei stat scret els cudischs ed ina massera da vaglia.

Ed uss veva Lucas Berther fatg pratica avunda per sorprendar il restaurant dalla staziun a Rapperswil. El e sia dunna han dau en ton sco nuot ina nova urdadira al restaurant e vegni en in giena enconuschents empau dapertutanavon.

Sper tutta stenta egl jester veva el aunc adina temps d'anvonz per il menaschi dil hotel dalla Cruna a Sedrun. La casa ei vegnida renovada ed engrondida recentamein.

Ins patratgi en quei connex dalla Canossa ch'era da sias uras in dils locals pli emperneivels e curteseivels dall'entira Surselva. El tila a strada da fundar ina scola da skis. In di reussescha ei agli schizun d'ereger la sutgera a Cungiari. Ina biala ovra, sia sutgera. Sper igl anim grond per l'industria dad jasters, fuva Lucas Berther in commember fideivel dallas societads da cant e musica ed adina prompts per quei u tschei survetsch. Buca emblidar lein nus il custeivel relasch en fuorma da numerusas fotografias ed ils differentes films che presentan las fiastas indigenas e surtut la cultura da graun e da glin en Tujetsch.

Lucas Berther ei buca pli. Tgi pomai sa descriver en in necrolog munglus la lavur e la fadigia che sezuppan davos quels treis quarts tschentaners. Ch'el ruaussi en pasch, il nunemblideivel Lucas Berther.

Ludovic Hendry

President Christian Berther, Sedrun

CR 1967, pag. 75



Tut consterni e sconsolai havein nus enderschiu la sera dils 13 de schaner 1966 la tresta nova dell'anetga mort de president Christian Berther. - Per l'empremagia duront la stagiun d'unviern 1965/66 haveva el priu neunavon ses skis ed era ascendius plein curascha cul runal viers Milez. L'aura era fina e biala e nies Christian quintava anflar restabiliment e forza per sia sanadad sgardalida ell'aria muntagnarda. - En buna cumpignia e da bien humor passenta el els aults in per uras e descenda encunter sera viers Dieni. «L'aria freida e fina e quei moviment el liber fan bein a mi», aschia s'exprima el arrivond giu sper la via cantunala. Mo il signur e patrùn sur veta e mort haveva disponiu autruisa. Spegli auto, che dueva menar el a casa en siu hotel, croda el per tiara ed ei ina bara. - Ins po cumprender tgei frida quei ei stau per sia famiglia, per parents ed amitgs, gie per tut ils vischins de nossa val. Nus savein far nuot auter che s'enclinar avon la decisiun divina, rugar per l'olma dil car defunct e mantener el en buna memoria.

Christian Berther ei naschius ils 8 de november 1910 sco secund affon de mistral Vigeli Berther. - En casa paterna, nua che la famiglia crescha culs onns sin 12 fargliuns, passenta Christian ina biala giuventetgna. Ei maunca buca variasiun ed era buca lavur en casa e sil funs. Christian sesvilupescha tier in giuven intelligent, spert e luvrus. Il bab tarmetta el alla scola purila dil Plantahof, nua ch'el sa emprender il menaschi puril e lungatgs. Plein curascha retuorna el a casa e surpren cul bab, ch'ei occupaus bravamein cun uffecis, il grond menaschi puril a Camischolas. Beingleiti vegnan ils Tuatschins attents sin las habilitats dil vischin Christian Berther ed elegian el igl onn 1943 sco cassier communal. Quei uffeci administrescha el duront 16 onns per cumpleina cuntentientscha de ses electurs. Dals 1959 entochen 1963 stat el alla testa della vischnaunca de Tujetsch sco president communal. En quella perioda croda la decisiun dell'ereziun della nova casa de scola a Sedrun. Christian Berther presidescha cun inschign e capientscha la cumissiun de baghiar ed acquista cheutras cuzzonts merets per quell'ovra culturala. - Duront in bienni ha il defunct representau il Cumin della Cadi sco deputau el Cussegl Grond. Igl onn 1947 surpren el da siu bab igl uffeci civil, ch'el administrescha entochen sia prematura mort. Duront in tschuppel onns eis el staus archivar communal. - Gl'ei buca pusseivel de far menziun en in necrolog de tut ils merets, ch'il car defunct ha acquistau per la vischnaunca de Tujetsch. - Nus engraziein da tut cor per la gronda lavur e pils numerus sacrificis prestai e purtai pil beinstar general. Igl onn 1961 ha Christian Berther cumprau il hotel Cruna a Sedrun e dirigiu quel ensemen cun sia consorta Maria e ses affons entochen sia davosa excursiun a Milez. Naven dagl onn 1962 stava il defunct alla testa della societad dils runals Sedrun-Milez-Cuolm Val. En quei gremium havein nus empriu d'enconuscher nies president sco in premurau collaboratur cun vasta egliada e capientscha pils novs problems dell'industria d'jasters. - Al pei dell'interpresa, ch'el ha favorisau, susteniu e presidiau ha el surdau si'olma, al Tutpussent. - Oz ein tuts quitaus terresters vargai per Tei. Nus sperein e rughein ch'ei detti in legreivel seveser cun Tes cars geniturs e fargliuns che han fatg il viadi grond avon che Ti. Ruaussa en pasch.

Scolast Tumaisch Venzin, Sedrun

CR 1967 pag. 78



Cun tgei curascha el fuva serendius circa miez settember el spital cantunal, suttamess all'operaziun e fidau sco adina dil cunti dil chirurg. Disdiu, tut ha disdiu. La mort ei vegnida bufatg bufatg e rut empermiez quei um d'ina natira da fier. La direzia dalla mort che ha fatg lartg oravontut a casia e nuotatonmeins enamez ils vischins.

Avon gnanc quendisch dis buc veva el festivau tut alla tgeua siu siatontavel onn. Sauns, sauns lev'el turnar a casa, entscheiver a dar scola sco substitut a Vella e festivar cun ils ses ils siatonta.

Niessegner veva disponiu autruisa. La frida ei vegnida anetgamein, schi anetg ch'ils ses han giu breigia d'entellir.

La stedia participaziun dil cordoli ed il grond conduct da bara han demussau evidentamein la simpatia ch'il defunct gudeva.

Tumaisch Venzin ei naschius ils 19 da settember 1896 a Selva sco beniamin dil Vigeli e dalla Rosa Venzin, nata Simonett. Siu bab ei morts giuvens. Persuenter ha la mumma, ina femna cartenta, savieivla ed energica priu da datschiert il guvernagl enta maun. La pli gronda facultad en sia casa, ei fuva scart e trentel, fuvan ils duns da ses buobs. Malgrad ils quitaus pecuniars, sedecida la Rosa da tarmetter ses buobs a scola vinavon, il vegl dils giuvens el collegi, il pign a Cuera el seminari scolastic. Cun tschaffen e plascher ed anim el cor ei il Tumaisch turnaus ils anno 1917 cun la patent da scolast en Tujetsch e surpriu la scola superiura a Sedrun. Ei fuva ual igl onn che siu sur frar Benedetg, igl anteriur protonotari apostolic, ha celebrau sia messa nuviala.

Otg onns a Sedrun, ils quater suandonts sco mussader dalla scola cumplexsiva a Cavorgia e puspei vegntgotg a Sedrun sco meister dalla scola inferiura, nua ch'il car defunct ei staus per propi da casa. Sper la scola dirigi quasi treis decennis la musica instrumentala da Tujetsch, sunau las orglas e cantau in miez tschantaner els differentes chors e staus dapertut sin terren cultural ulti activs. Quater decennis e miez fatg il correspondent dalla banca cantunala, promoviu il transit ed il commers dalla val e seprius en surtut per l'industria dad jasters. Fundatur e promotur dalla scoletta da Sedrun e dalla tgira da malsauns e biars onns cassier dils paupers. Conta lavur e tgei sacrifici sezuppan davos quell'as cefras schetgas e senza cor.

Tumaisch Venzin fuva in um d'in humor tut aparti, curteseivels e caussas da bien cor. Cons, cons ch'el ha gidau ord las miserias e scret tschiens e tschiens brevs per ses convischins. Ses scolarets, ils pigns sco el scheva, fussen i tras il fiug per lur magister, las mummas preziavan ordvart sia gronda buntadeivladad.

Muort sia aviartadad, sinceradad e beinvuglientscha fuva el beinvesius el ravugl dils collegas. Siu plaid beinvulent fageva impressiun e vegneva tedlaus. Aunc pli lartg ch'ella cuminonza ha il Tumaisch fatg en famiglia. Cun tgei plascher e perseveronza el ha giu quitaus per ils ses, ses agens.

Buca meins che diesch affons. In ei morts en fascha. A nov ha el procurau ina bufatga e tschecca existenza. Mai senuspius dad expensas, plitost el sez engaldu. Tumaisch Venzin ei buca pli. Ei va vess da serrar quella largia recenta e sensibla.

El vegn a restar en buna memoria, il Tumaisch. Ch'el ruaussi en pasch dil Segner.

Ludovic Hendry

Maurus Berther, Sedrun

CR 1969 pag. 57



In interessant tip tujetschin eis el staus il Maurus Berther, absolutamein buca ord l'èra. Gia siu tat, Giachen Martin (*1809-1872), ha buca teniu ora ditg en Tujetsch. Suentar ver empriu da calger eis el viagiass pil mund entuorn. Sco siu cudisch da viadi (Wanderbuch) indichescha eis el staus sin viadi da 1836-1847. Quel ha menau el da Ragaz, nua che el ha luvrau sco manual vid la via dil bogn e la canalisaziun dall'aua dil bogn. Da leu eis el serendius ad Oberried - Altstätten - Lustenau - Menningen - Altstätten - Constanza - Trogen - St. Fiden. En quels loghens ha el pli u meins ditg luvrau tochen 1840.

Lu eis el sez daventaus sorprendider da vias e viasfier: 1843 a Peterszell, lu a Freiburg en Breisgau - Stein - Friederichshafen - Kirchheim e Laufen tochen ils anno 1846. Quei onn eis el returnaus en sia patria ha fundau famiglia e lu entuorn ils anno 1860 e sequents ha el surpriu aunc cun auters l'erecziun dil stradun dils cunfins denter Mustér e Tujetsch tochen s. Brida. Igl ei la part da quella via, che ei aunc ualti intacta dapi lu, schebi che il traffic ei semidaus enteifer quels 100 onns considerablamein. Lu ha el aunc eregiu 511 m dalla via vi d'Ursera, il schinumnu "Bertherskehr". In original da sia parentella ei buca mo il tat dil Maurus staus, mobein era siu aug Giachen Martin (1858-1944). Da nus buobs era el numnaus mo igl "Aa" perquei che el entschaveva mintga construcziun cun in a. El ei staus in dils paucs Tujetschins che han visitau (1903) la Tiarasontga ed ha duvrau sin quei viadi sco siu diari indichescha 585.- francs. Ei il Maurus era buca staus sco el ella Tiarasontga sche era el tonaton "Cavalier dalla s. Fossa" ina societad che va anavos en siu origin el temps medieval e nua che il singul commember porta oz grondas unfrendas per sustener ils cristifideivels ella Tiarasontga.

Era da vart dalla mumma, ina sora da sur Desax da Mustér, era il Maurus dotaus cun buns duns. Ils attestats da Sur Desax, che il Maurus conservava cun pietad, muossan excellentas notas, che fan seturpegiar ils pli bia scholars dad oz dalla scola claustrala da Mustér. Quella originalitad e ses buns duns ein lu semussai tier il svelt buobet il feigl dil Vigeli Giusep Berther (1850-1895) e la Maria Desax (1844-1923). Naschius ils 26 d'avrel 1880 ei siu bab gia morts 1895 cu il Maurus veva strusch aunc giu isau las caultschas als bauns dallas empremas classas dalla Scola claustrala ed era serendius a scola a Zug. Cun la mort dil bab eisi stau finiu cun ses studis. Ils ligioms che han uniu el dapi lu cun la claustra ein mai pli ruts. Buca siu aug da cusrins, pader Baseli Berther, era siu preferiu on claustra, mobein pader Placi Müller *1925. Cun tgei anim raquintava el da quei pader! La carezia che el ha giu per el ha el transplantau sin tut ils conventuals ses confrars, che han dau ad el il tetel "da frater conscriptus". Cheutras ha el art e part da tut las bunas ovras, oraziuns, s. messas etc. che vegnan fatgas en claustra. Ins sa bein dir: Ils conventuals lain prender part el da lur ovras dalla misericordia spirituala, ed el sez ha schau prender part els rehamein dallas ovras dalla misericordia corporala. El sez era buca cuntents ils davos onns, sche ina jamna vargava, senza che in u l'auter pader «bruoder» ni hosp claustral visitava el.

Insumma, sia caracteristica sa ins bein exprimer cun ils plaids d'in pader da Salzburg che ha visitau el aschi 15 dis avon sia mort: "Igl ei donn e puccau che in aschi bien carstgaun sto murir". Quella buontad veva el gia en ses giuvens onns. Lucas Cavegn ha raquintau co il Maurus hagi suenter la mort da siu hab partiu ora las pipas als buobs a Mulinatsch. Detg gaudi per quels ragners!

Il far il pur en Tujetsch ei dira lavur, principalmein lun, sche ins ei aunc in giuvenot plein slontsch ed ideal che vul emprender zatgei. Quei era il Maurus. Mo el ha stui semetter en cun siu aug Giachen Martin. Veva siu bab era in pulit fatg, da quei da 15 tgaus biestga; sche era ei tonaton buca lev da luvrar cun igl aug. Cheu ha il Maurus in bi di fatg il fagot, ed encuretga sia fortuna egl jester. Bein dotaus cun duns, endisaus da mirar e luvrar, cun anim per sescular ha el gl'emprem fatg igl emprendissadi da tapazader lu enteifer 3½ onn empriu da pasterner e patissier tier la gronda fatschenta da Bertschi a Turitg. Lu ha sia carriera d'hotel entschiet tochen al camerier. Gl'emprem a Lucerna, lu Vevey, Zug, Interlaken, e puspei Lucerna. A Lucerna ha el empriu d'enconuscher il coiffeur Jud, ed ha lu empriu in onn da coiffeur.

1913 retuorna el en sia patria a Sedrun e leu daventa el il fac totum: Pur, apicultur, patissier e

cuschinier principalmein per las nozzas en casa e buca d'emblidar: coiffeur, tagliacavels e barbier. E tgei pagunas pretendeva el! Siu tat menziunaus alla entschatta retergeva sco sorprendider cantunal 45 raps per translocar in m³ tratsch ed il Maurus 50 raps per far la barba.

Siu tat che veva era ina stizun a Camischolas e vendeva pari bein bugen vinars als talianers, pertgei en siu schurnal paradeschan quasi entiras paginas mo cun vinars, pretendeva per il glasin 5 raps ed il fund tubac vendeva el per 40 raps, mo il Maurus lez pretendeva all'enschatta da sia carriera sco coiffeur 30 raps, alla fin veva el alzau il prezi sin 80 raps per tagliar cavels. La pira lavur veva el la dumengia: Ord da messa, migliar da sestrunglar in taglier suppa e lu alla lavur. Mo la paga da quei di mava per bunas ovras.

Pilver, buns eis el staus. Cu il capitani da mats, Lucas Cavegn, ha visitau el ina gada a Lucerna ha el raquintau dils fastedis ch'el hagi da tener en uorden il "sontget dils mats". El munglassi far far in garter per che ins sappi buca duvrrar el sco remisa. «Sche tarmetta la mesira da me, iu vi schon vai quitaui.» Il Maurus ha schau far il garter, mo quen han ils mats aunc oz survegniu negin.

Il pli pauc carezia pareva il Maurus da ver per sia sora, la Barla Catrina (1879-1961). Quei era il detg sepiclem! Cheu valeva denton veramein il proverb: Tgi che sepicla seletga! Gie bugen veva el la Barla Catrina. Quei ha ins pér viu da dretg cu ella ei stada malsauna. Cun tgei carezia ha el tgirau e vegliau di e notg. Cu ella ha lu giu bandunau el 1961, ei stada sin santeri, lu era ei vit en casa e buc in di fuss vargaus ch'el vess buca visitau sia fossa.

Insumma eis el staus buns culs malsaus. Schubers e versaus era el in encuretg samariter. Igl onn dalla gripa (1918) ha el vegliau meins ora. Ina ovra da caritad ch'el ha exercitau a biars e biars era il vestgir ils morts.


Buontad ei stau sia caratteristica mo sin atgna moda meinsvart originala buca capeivla a tuts. Ei era ina buontad buca loma mo buna, empau sco ils nitschuns. Tgi che ha gia durmiu sin quels sa che ei foran l'enschatta buca mal, mo els tegnan cauld ed ein loms e buns. Buca in pader Maurus Carnot ei stau siu bien amitg, mobein in pader Notker Curti cun sias strihadas. Da lez ha el era empriu il bien senn per caussas veglias. Cons documents da valur per l'istoria, contas pintgas caussettas che el veva l'opiniun che ses artavels vegnien a valetar pauc ni forsa schizun fierer enta fiug ha el mess en salv e regalau a tals che han capientscha persuenter. Cheu vala ad el in engraziament en num da l'entira Val Tujetsch!

Ed ussa ruaussa il Maurus sin santeri da s. Vigeli, la baselgia dil qual el ha gidau a renovar. Per las baselgas e capluttas veva el insumma in maun generus sco era per tut ils basegns dil concarstgaun. Levs ei il murir staus per el. Ils davos onns era sia veta pauc auter che far oraziun, e gia avon che ir a messa recitava el in rusari. El sez ei staus buns mo ha era viu il bien da siu concarstgaun e con savens ha el detg avon dus onns cu el era grev malsaus ed ins visitava el: "O cun mè voi begn ad ins è cun mè sgarscheivel buns." Era ti Maurus eis staus buns e pli che buns: Sche ruaussa en pasch!

Pader Vigeli Berther

Baseli Berther, Rueras

CR 1971, pag. 330



Ina aulta vegliadetgna, 83 onns, mo ella vegliadetgna schai adina ina certa madirezia dil carstgaun. Cargaus cun la peisa da quels onns ha il vegl president communal e deputau Baseli Berther da Dieni priu comiau da nus ils 24 da zercladur 1970. Ils davos onns da sia veta ha el saviu mirar anavos sil prestau cun satisfacziun.

Oriunds era il Baseli dalla ucliva da Dieni. Siu bab, il Sep da Dieni era seretratgs dalla casa paterna a Camischolas a Dieni. Lur casa a Camischolas, la casa ch'era aunc von buca tons onns habitada dil «capitalist» dils Tujatschins, digl aug da cusrins dil Baseli, Giachen Martin Berther, veva gronda tradiziun. En ella eisi stau bia traffic, principalmein entuorn ils anno 1860 e sequents, nua che la via dall'Alpsu ei vegnida baghegiada. Il tat dil Baseli, Duri Battesta e siu frar Giachen Martin, associati cun Castagnola da Lugano ed Augustin Condrau da Mustér, han eregiu quels onns il stradun dils confins da

Mustér tochen a S.Brida. Inschignier era signur Depuoz, in pedant d'emprema classa. Quella interpresa ha purtau pauc gudogn. Meglier eisi iu da baghegiar il schinumnu «Berchterskehr» da tschei maun dil cuolm d'Ursera. Da quei temps era la casa a Camischolas magazin da victualias, bubrondas, material etc. per igl entir consorzi. La casa a Dieni era vegnida baghegiada mo levmein pil temps da fenar. Mo il Sep ei staus leu, e leu ha era il Baseli viu la glisch dil mund ils 30 d'october 1887. Sia mumma ei stada Maria Barla Deflorin.

La rauba che tat ed aug vevan fatg tras lur activitad sco sorprendiders vevan ei investau en praus e funs. Perquei ei il sulet buob ensemen cun sia sora Maria Barla beinspert vegni sut il giuv dalla lavur. Lavur ha ei mai muncau a Dieni. Tonaton ha il Sep giu quitau d'instruir ed educar endretg siu fegl, ed ha tarmess el a scola on claustra, nua ch'el ha frequentau la preparanda e la reala.

Influenza sil giuven han segiramein giu siu aug che era en claustra, pader Baseli Berther e sur Tumaisch Berther. Onn per onn passentava igl umeneri, pader Baseli cun siu tgau sco in «fussbal» - sco in buob da Mustér ha da gliez temps giu caracterisau el - sias vacanzas a Dieni. Da leuanora ha el rimnau las numerusas notizias sur l'istoria tujetschina nudadas en ses carnets deponi ussa ella biblioteca romontscha. Quei fatg ha segiramein entschaliu il ferm ligiom tradiziunal. Denton para siu aug sur Tumaisch - in original da sum tocca dem - da ver influenzau internamein ed externamein pli da rudien il car defunct.

Segir ha sur Tumaisch, igl anteriur plevon da Surrein, Vignogn e Platta dau anim e slontsch al giuven pur. Bein era sur Tumaisch en emprema lingia plevon e spiritual, mo el vuleva gidar il pievel spirtalmein e materialmein. Da quei dattan perdetga sias publicaziuns litteraras: «Relaziun denter scola e casa paterna», «Igl alcohol e sias consequenzas», «La cassa da Raiffeisen». Era ha el animau ed instruiu inconten il giuvens purs. Aschia sedi ei che ils purs da Surrein hagien tuts stuiu alzar ils clavaus per ver plaz pil fretg il temps da sia dimora a Surrein.

Externamein, cun excepziun dalla cumparsa gigantica da siu aug, era il Baseli tagliau giu il tgau siu aug. Ils smanis cun tgau e bratscha fageva el ual sco lez. Il raschienen preferiu dil Baseli era il puresser. Prezis da tiers, qualitads da tiers, raschienen sur praus e pradas, baghetgs e nuegls, tut quei che scadin pur en nossas muntognas sto far: Spargnar, luvrar e buca duvrar memia, quei era iu vi en carn e saung. Tgei interess veva el dil menaschi da ses fegls che han surpriu il puresser digl uestgiu a Landquart. Cu el ei buca pli s'interessaus dil puresser, lu ha ins saviu, ussa va ei da rendiu.

Cun 25 onns ha il Baseli maridau la giuvna Mariuschla Gieriet che ha regalau ad el varga in tozzel affons. Endisch ein aunc en veta sis buobs e tschun buobas. Tuts ha el schau scolat ed era en cheu vesa ins l'influenza da siu aug sur Tumaisch, il piunier dalla scola. Dus fegls, sur Giusep, oz plevon a Lumbrein e sur Tumaisch, plevon a Falera, han astgau ascender igl altar dil Segner. Ils auters han tuts fundau ina atgna famiglia e tier sia mort veva el 54 beadis ni biadias e dus sutbiadis.

Sper siu pensum da bab da famiglia ha el era aunc giu temps per differents uffecis ch'els vischins han surdau ad el. Duront otg onns, dil temps dalla crisa, ha el presidiau la vischnaunca e quater onns eis el staus deputau dil Cussegl grond. Uffecis oz sbittai e ruffidai muort cumadeivladad ha el administrau cunscienziamein. Aschia eis el staus el cussegl da scola, onns ed onns ugau parvenda da Rueras e schi ditg sco ins sa seregurdar el chor baselgia da Rueras. Il Baseli, il Duri Vigeli Cavegn ed il vegl sur Venzin eran ils capo-cantadurs. Sur Venzin veva il grond dun da cantar da bass, il Duri Vigeli da cantar tral nas, mo il Baseli veva ina biala clara vusch. Beinenqual episodio ualti comica savess ins raquintar da quei trio.

In original ei il Baseli staus buca en quei grau ch'el vess insistiu sin siu meini. El era accessibels pil meini dad auters ed in da ses plaids preferi era: «Gie, gliez stu ins schon era sche», ni «Gliez stu ins schon era di.» Dasperas preferiva el bein il vegl e cumprovau.

Era sia veta ha giu dis da sulegl ed umbriva. Ils pli bials dis eisi bein stau cu ses dus fegls han astgau ascender igl altar dil Segner, e lu cu el ha ils 19 da november 1962 astgau celebrar las nozzas d'aur entamiez ses endisch affons e roschada biadis e biadias. Mo la sera dalla veta era cheu, la vegliadetgna, la mendra malsogna. Avon quater onns ha sia buna consorta bandunau el. Cheu ha ina certa grevadetgna surpriu il bien Baseli. Mo adina ha la cardientscha dau sustegn e gidau el era ellas uras umbrivadas. Il davos eis el stizzaus sco ina candeila seconsumada per far clar e mussar la via als auters. La glisch dil Segner sclareschi ad el!

P. Vigeli Berther

Pader Alexander Beer

CR 1972 pag. 339



«Lein dir gie tier la veglia da Diu, pertgei el ei carezia. Lein viver aschia che nus sesanfleien puspei ensemen tier Diu il Bab. Buca bargi per mei, mobein lein urar in per l'auter.» Quels plaids ord il testament spiritual da pader Alexander espriman il meglier sia tenuta, siu sentir e patertgar: En tutta sempladad far la veglia da Diu. Gl'ei ver, nus havein breigia da capir pertgei il Segner ha clamau siu survient, pader Alexander aschi baul - aveva el gie strusch 50 onns - ordmiez siu fritgeivel operar sco missiunari en l'Africa. Sco siu superiur, il pader provincial Schnarwiler ha detg el riug da bara, anflein nus forse la risposta sin quella damonda els plaids da sogn Paul: «Seigi che nus vivien u murien, nus essan dil Segner.»

Pader Alexander Beer fuva oriunds da Camischolas. Leu eis el naschius ils 29 da schaner 1922. Ses geniturs Gion Andriu e Maria nata Curschellas ein gia igl atun 1924 seretratgs cun lur famiglia giul Thurgau a Wittershausen sper Aadorf, nua ch'ei han surpriu in bein puril. Leu ha pader Alexander passentau ventireivels onns d'affonza cun ses 6 fargliuns. Gia baul sededesta en el il giavisch da vegnir missiunari. Per ils geniturs ha ei muntau in grond sacrifici da schar ir a scola lur fegl vegl ch'els havessan saviu duvrar bein a casa tier la gronda lavur sil bein puril. Tuttina han els bugen detg gie tier la veglia da Diu. 1934 entscheiva pader Alexander cun ils studis gimnasials tier ils paders alvs a Widnau, cuntinuescha e finescha quels cun la matura a Sogn Murezi el Valleis. Denton fuva la secunda uiara mundiala ruta o, ils confins serra ed aschia sa pader Alexander buca ir en Algeria per preparar sia lavur da missiunari. El studegia zacons onns a Friburg, mo sto denteren prestar bia survetsch activ. Finida l'uiara astga el 1945 serender en Algeria per entrar el noviziat dils paders alvs. Ils studis da teologia fa el a Thibar sper Cartago/Africa. Ordinaus spiritual igl emprem da fevrer 1949 celebrescha el la messa nuviala a Tānikon e la stad sissu a Sedrun. Adina ha el salvau bien contact cun ses parents ed enconuschents en sia patria tuatschina.

Il giavisch da saver ir en las missiuns severifichescha buca aunc. Ses superiurs surdattan ad el in post d'administratur ed econom, 1949-53 en la claustra dils paders alvs a Widnau/SG, 1953-58 en la claustra centrala digl uorden a Ruma. Cun siu senn per uorden ed exactadad, sia biala scartira deva perdetga da quei, fuva el sco predestinaus per la lavur d'in econom. Denton siu grond desideri fuva aunc adina astgar ir en las missiuns. Finalmein, 1958 severifichescha quei giavisch. El astga serender sco missiunari el Congo, en l'Africa. Bein gleiti ha el empiru il lungatg indigen. Ussa sefiera el en la lavur da missiunari, va viado en las pleivs a far messa e priedi, administrar ils sogns sacraments e dar ductrina. Memia spert vegn quella lavur da missiunari interrutta. Igl onn 1964 dat ei gronds disturbis el Congo, ins sa dir revoluziun. Ina partida missiunaris dalla Belgia vegnan assassinai. Era pader Alexander e ses confrars vegnan pigliai e mess en perschun. Quei ei stau grevs dis, jamnas da temas e fetgas per ils missiunaris. Mintga di havess saviu purtar ad els la mort. Mo cun gl'agid da Diu pon els mitschar dil grond prighel. Star vinavon el Congo fuss pil mument nunpusseivel. Ils missiunaris ein sfurzai da turnar a casa en Svizra. Ils 4 onns (64-68) che pader Alexander sto star a casa resta el buca lischents. El gida o en las pleivs, entras priedis e referats sesprova el da perschader la glieud dils gronds basegns dallas missiuns. Cu el sa 1968 puspei turnar en las missiuns el Congo, anfla el leu in pauper uorden. Tut quei ch'els missiunaris havevan duront onns da strentga lavur e gronds sacrificis eregiu fuva destruiu. Mo ils paders missiunaris piardan buca la curascha. Ensemen cun ils cristifideivels indigens semettan els alla lavur ed eregian puspei baselgias, scolas e spitals. Cunzun per baghegiar in center social ha pader Alexander impundiu sias forzas. Tgei plascher ha el giu cu el ha survegniù dall'unfrenda da cureisma svizra ina contribuziun per quei center social. En quei center social san giuvens africans ir a scola e vegnan, era instrui en differents mistregns per saver purtar quei ch'ei han empiru viado en ils vitgs.

Puspei sto pader Alexander interromper sia lavur en las missiuns, quella ga per motivs da sanadad. Gia dapi zacons onns piteva el d'in grev mal el dies. Gia 1966, duront siu congedi sfurzaù aveva el stuìu schar far ina operaziun.

Igl october 1969, pia mo in onn suenter ch'el haveva puspei entschiet cun siu operar en las missiuns, sto el turnar a casa en Svizra, serender el spital e sesuttametter ad ina greva operaziun. Era ina tiarza operaziun el spital cantunal a Turitg porta buca il giavischau migliurament. Pader Alexander vegn per part schiraus. Il davos da fenadur 1970 vegn el transportaus el spital a Lucern nua che las soras da s.Onna han bien quita per el. En ina brev a parents ed enconuschents sin Nadal scriva el: «Ussa sun jeu missiunari per l'Africa sco malsau en letg ed haiel bia temps da far oraziun e caschun da sesacrificar per las missiuns.»

Gie, il Segner ha vuliu da siu survient buca mo la lavur sco missiunari, mobein era il sacrifici da sia veta. Bia ha pader Alexander operau quels paucs onns en l'Africa, forse aunc pli bia ha el operau per las missiuns tras siu pitir en letg da malsogna. Ils 13 da mars 1971 ha Cristus retg clamau siu fideivel survient tier el en sia gloria.

Sias restonzas terrestras ruaussan el santeri a Tänikon/TG. Pader Alexander vegli dal tschiel ano rugar per novas clamadas da missiunaris.

Sur Tumasch Berther

Placi Jacomet

CR 1976 pag. 408



Probabel ein ils avdents da Surrein buca ual quels dalla veta tgunscha. Surrein ha buca mo runtga e tschespet darschalaun, mobein era la spunda sulegli da Claus ed il fil dalla cresta entochen si Foppas. La casa osum sin la costa ei la casa paterna da Placi Jacomet, leu nua ch'el e siu frar Vigeli e la Nescha, la sora adoptiva, ein carschi en ina cumpignia sempla e bufatga. Sco quei ch'ei fuva magari usitau da lezzas uras, il bab veva num Leci ed ins scheva all'entira feghialonza semplamein ils Lecis. E la noda fuva s'enfirmida tondanavon ch'ins ha ora ed ora detg il Placi dils Lecis.

Jeu fuvel in buobetgel e vadler e pertgiravel nov vadials sils Neidis. Sin scala-crap avon casa sun jeu s'entupaus cun el. La plipart dalla puraglia spel dutg fuva ora sil trentin e nus, nus vevan da vender ina buccada mughera. Suenten il marcau ha il Placi tunschiu il maun al bab sco da nundir ch'el stetti buns per quei ch'el ditgi. Jeu vess cartiu senza ch'el detti il maun, damai ch'il Placi resplendeva ina segirezia quietonta.

Siu bab, il Leci dalla Castgina, lez fuva in pign proprietari. A Surrein ha il Placi empriu da tener casa, da preziar il funs magher e stantiv. Ei drova energia e perseveronza dad ir agradora per la via dalla vertid; persuenter ein las stagias sper la via ton pli curteseivlas. Ils pli datier ed ils vischins ein morts d'ina mort sereina e consolonta. E la cardientscha digl um dils rovens ei vegnida statteivla, quei che ha tuttavia buca impedi el silsuenter da far carriera.

Cun quei impuls eis el vegnius da Surrein a Sedrun ed ha ensemblamein cun siu frar Vigeli cumprau ina casa sper via ed il funs dils Mugglis. Ses principis da viver fuvan serius, aschia ch'il Placi Jacomet ha surmontau l'entschatta fadigiusa. El ei scochemai daventaun in pur respectau amiez il vitg da Sedrun. Habels sco el fuva acquista igl um enina l'attenziun dils vischins. Il sezs han eligi il Placi salter e cassier e gerau, essend ch'el dumignava exemplaricamein siu fatg e veva e talien pigl uffeci public. Ils onns buc, quels onns nauschs d'avon l'uiara epi l'uiara sezza, dils 1939 entochen ils 1945. A casa ina famiglia numerosa che veva basegns dil bab, in smugl da menaschi e suren il survetsch activ. Mo cun ferm curonta onns ei igl um sils sumfils dalla veta ed el resca e damogna in bien ton. Placi Jacomet impunda siu temps e stat a disposiziun als vischins.

Tschuncheismas 1943, la tscherna da president communal ei biala. Placi Jacomet semetta els stadals, spargna e tegn adauen perfin ils da tschun. Ils projects gronds dalla vischnaunca da Tujetsch ston vegnir refretgs, refretgs sils onns grass. Dus biennis davontier.... e las tschaveras fuvan meinsvart ualti

stuffias. Igl ei zaco iu pli lev, cun quei che sia consorta, la Zia, ei segidada bein cul mariu. Problems da corrispondenza hanada saveva el ver endamen cun ella, la dunna. Las brevs dattan lavur ed ei capeta ch'ins scriva nuidis.

Ils anno 1951 vess il Placi saviu dir da na. El fuva en spir forza e surpren danovamein il tgamun dalla vischnaunca e diregia ella quella gada per ver quater biennis. Il quitau per il plaz da lavur ed in'existenza per ils vischins han fatg semarmenir il patratg d'ir alla tscherca da novas resursas. La radunonza da vischnaunca dils 13 da fevver 1955 ei memorabla. Suenter biaras resalvas e tgisas tut a dubel concedan ils vischins da Tujetsch da vender lur auas alla NOK. Il president e ses geraus, che vevan fatg lavur da biestg, registreschan success. Perbia buca tut ei stau bein fatg. Nuvs e nuvs ein vegni suenter el petgen. La damonda, schebein ins vessi saviu prevegnir da quei u tschei maungla ins affimar. Priu ch'ei seigi buca stau in veritabel pegliasis, generalmein ston ins conceder ch'ei seigi endretg. Per quei lein nus buca sminuir ils merets, oravontut ils merets da president Jacomet. En vesta dallas entradas ha il pievel da Tujetsch astgau entscheiver a trer in tec flad. Ils vischins da Rueras survegnan ina nova casa da scola. Ins quenta ferm da realisar ils ulteriurs plans ch'ei sin rucca.


Sco segn d'engraziament portan ils umens da Tujetsch lur president sco derschader circuita. Anoviar ha el forsa mai dau tier, en sesez veva el denton giu plascher giudlunder. El, il Placi Jacomet, che saveva numdadiu buca ir cun quei ch'el senteva silla palmamaun.

Il mument ch'el ei ius sco president pudeva ins nuota spitgar cun las propostas per in niev. Placi Jacomet ha surris ed ei ius per siu fatg senza canzuns e ghirlandas e poesias. El ei turnaus a semetter cun omisduas ella stuera dil menaschi puril; ed el ei gleiti secumblidus vi ch'ins veva munchentau da dar agli las arbagias. Ils davos onns tuttavia, il sezs ein stai tgeus e da gronda meditaziun. Ch'el ruaussi bein e retscheivi la pasch ch'el mereta.

Vic Hendry

Pader Vigeli Berther OSB

CR 1979, pag.361



Eis ei in siemi ni eis ei dira realitad? Venderdis, ils 30 da december 1977, allas 3 suentermiezdi essan nus aunc s'entupai sin claustra en tutta cordialitad per ina discurrida denter amitgs sco biaras gadas. Ti has giu grond plascher da nossa viseta che fuva quasi tradiziunala. Nus havein dau in paterlada da quei e da tschei ella stanza da recepciun ed essan lu serendi cull'entira famiglia en la stanza dils hosps per in caffè. En moda zun curteseivla ed amicabla has Ti demussau hospitalitad benedictina. Ti eis s'interessaus dalla famiglia, dalla veta professiunala, da nossas occupaziuns communablas, has relatau dalla veta claustrala, da Tia parentella, da Tes panzieris pil romontsch. Ti has ofniau che Ti hagies luvrau pulitamein avonmiezdi vid la bilanza annuala dalla claustra, mo hagies lu pussau empauet suentermiezdi e selegries da puspei s'entupar cun vegls amitgs. Allas 16.15 has Ti rimnau la vischala per purtar ella sil plat da survir en cuschina. Avon has Ti aunc dau all'entira famiglia ina benedicziun zun persunala e biala. Jeu hai remarcau quei fatg ed engraziu cun plascher. Ti has surris ed eis sortius cun la vischala per serender en cuschina e returnar. Igl ei stau Tiu davos viadi en veta.

Ti havevas aunc fatg attents mei che Ti hagies ussa il numer dallas Annalas che jeu encurevel avon entgin temps. Per quei hai jeu cartiu che Ti seigies serendius en Tia carezada biblioteca romontscha. Frater Simon ha denton purtau en tutta agitaziun la tresta nova che pader Vigeli seigi daus afuns en cuschina e detti negins segns da veta pli. Tuttas emprovas da clamar en veta Tei ein stadas adumbatten. Cuort suenter han ils miedis curri neutier mo saviu constatar la mort, caschunada entras ina disdetga dil cor.

Cuorta biografia

Baseli Berther ei naschius ils 14 da settember 1911 a Rueras sco fegl da Gion Fidel Berther e da Maria Ursula Hendry. El era il cratsch dad ina famiglia purila da 10 affons. Memia baul piarda la famiglia

numerusa il bab e quei ei adina ina frida che va afuns. Per la mumma munta quei dar damogn cun tut e procurar per in'existenza andanta als affons tut persula. «Aschia fa pader Vigeli gia baul l'experientscha che la veta ei buca mo ina spassegiada, mobein in luvrar e stentar cun ils talents e las forzas ch'il Segner ha dau.» (riug da bara da sur T. Berther). La famiglia Berther ha regalau treis clamadas spiritualas, sper pader Vigeli aunc sora Blancarda Berther p.m. ad Ingenbohl e sora Maria Ursula Berther a Baldegg.

A caschun da nossa sentupada dils 30 da december ha pader Vigeli raquintau da ses fargliuns vivents e dils morts; ina sora (Maria Ursula Walder-Berther) vivi aunc oz a Surcuolm, in frar (Francestg Berther-Venzin) seigi a Rueras, ina muniessa (Maria Ursula Berther) a Baldegg ed el seigi il Benjamin. Ils biars da ses fargliuns seigien morts en conseguenza d'ina disdetga dil cor. El sez sappi era dapi 10 onns (onn digl emprem infarct dil cor) co ei stetti cun el. «Ins lavura e fa quei ch'ins sa e cu il Segner cloma, lu van ins. » (T. Berther). '

Il di avon sia mort ha pader Vigeli aunc visitau siu frar e ses parents enta Rueras. Sco siu frar ha palesau al sribent da questas lingias hagi il defunct magliu da curascha gnocs, ina spisa da mur e savur indigena. El hagi lu aunc envidau siu frar per la «marianda», mo pader Vigeli hagi replicau: «Na, ju turna betga ple». Quei «na, jeu tuornel buca pli» di il Francestg, hagi occupau fetg el ed el hagi durmiu male e giu traso sco in stgir presentiment.

Pader Vigeli ha fatg il gimnasi a Mustér e Sarnen, profess ha el giu ils 15 d'october 1935 ed ei vegnius ordinaus spiritual ils 3 da zercladur 1939. Ils 30 da december 1977 ei il cuors dalla veta da pader Vigeli staus finius.

Il pader benedictin

En ses plaids da beinvegni als fideivels serimnai per la sepultura e d'engraziament al trapassau ha monsignur avat Victor puntuau la fideivladad alla communitad claustrala, l'immensa premura, il grond spert da lavur da pader Vigeli. Avat Victor era a miu manegiar buca mo il superiur, mobein in amitg da pader Vigeli. Jeu sai seregurdar ch'ils dus conventuals fagevan gia avon 20 onns lur spassegiadas, turs cun skis, turs da muntogna comunablamein. Ual perquei vegn igl avat a ver fatg cun grev cor las funcziuns da bara per siu amitg.

Il magister da latin e romontsch

Pader Vigeli ei staus professor da latin, romontsch e contabilitad. Jeu sai seregurdar fetg bein da nossas uras da latin. Entschiet veva ei cun pader Gregori, igl actual senior en claustra tenor profess. Ella tiarza classa ei pader Vigeli daventaus nies magister da latin. Il cuncontrast ei staus gronds e la midada per biars empau da dolurusa. Pader Vigeli fuva in stregn scolast, cun disciplina da fier da lezzas uras. El era stregns cun sesez, aveva ina ferma voluntad e pretendeva era lavur entira da ses scholars. Ils verbs irregulars dall'Ars Latina, ils schinumnai «communists» (perquei ch'els fuvan stampai cotschens) vegnevan scuos e scudi ch'ei siglieva brastgas. «Utschi maglia ni crappa», aschia pressapauc tunava sia devisa. Mo nus savevan vida tgei che nus fuvan e vein tratg nossas consequenzas, per nies bien. Pader Vigeli saveva bein latin, meinsvart schizun meglier che tudestg. Era ell'instrucziun da romontsch (che aveva liug da lezzas uras cumpletamein agl ur digl urari (17.30-18.00 duas gadas ad jamna) pretendeva pader Vigeli in bien ton, e tuttina era ei ina differenza denter quels dus roms. Nies professor da romontsch capeva cunzun da metter peisa sin la vart historica e cultural-historica e da far ina buna sintesa culla litteratura. Cheu sepaleisa la parentella spirtala da pader Vigeli Berther cun pader Baseli Berther (1858-1931). Pader Vigeli empruava cun inschign da far ressortir il spert cultural romontsch e s'occupava meins dalla vart formala, linguistica. Per ils futurs academichers pudeva quei valer, tonaton vessen ual quels saviu profitar formalmein en romontsch da lur formaziun humanistica. - En la davosa classa havein nus giu contabilitad tier pader Vigeli. El che s'occupava dapi 1951 dil grond menaschi claustral e da sia bilanza, fuva senz'auter qualificaus dad instruir nus en quella materia. - Dils 1939-42 ei pader Vigeli viceprefect e da 1942-45 prefect.

Crosa empau dira, mo bien coc e cor sincer

Pader Vigeli fuva in um grond, cun spatlas ladas, ina fatscha marcanta, in frunt ed in nas profilau, in ver pegn d'untgida. Jeu hai adina admirau el tschelau d'ina vart ses maununs, il pader cun ina detga braunca, da l'autra vart sia scartira fina ed eleganta sco quella d'ina secretaria. Pader Vigeli veva in'urdadira marcanta, ina cumparsa magari resoluta. Certins han forse tratg conclusiuns fallidas da sia demananza. A quels less jeu clamar cun Giachen Michel Nay en sia poesia Miu vitg nativ:

«Els ein ca gest dils pli mulai,
ils umens da cuderas,
essend els buc vid vons disai,
vid compliments, caneras.
Mo sils vischins sas sefidar
sco sin in grep, sin in rempar.»

El lungatg romontsch vein nus d'ina vart l'expressiun «truffels en pelletscha ni truffels en mondura», da l'autra vart «far ora ni prender ora il cries u far ora la crosa». Cun quei fetschel jeu allusiun al fatg ch'ins sto saver differenziar tier pader Vigeli, forse cunzun dils giuvens onns, la paratscha u la crosa dil coc u nushegl. Jeu hai empriu d'enconuscher pader Vigeli sco um real, grad, sincer, fideivel ed aviert. Ins savess cuntinuar cun gest, loial, franc. El scheva zatgei agradora, alla grada, senza viarclas, senza metter si a sesez buccari. El fuva buca igl amatur da stgisas e pretexts, cunzun buca dalla faulsadad. Pader Vigeli era buc igl amitg dils tschatschers e paterluns, buc igl amitg dalla 'politica tschuffa', era buca da quella el moviment romontsch. El fuva enconuschents per enqual strihada, denton per tuccas e teccas beinmanegiontas, buca blessontas.

En ina da sias davosas notizias anfladas da avat Victor ha il defunct nudau il suandont: «Jeu engraziell a tuts superiors e confrars per la grazia ch'els han accordau a mi da viver en la cuminonza claustrala. Sche jeu sun era staus mintgaton in «enfant terrible», hai jeu mai offendi in u l'auter sapientivamein ed expressivamein. Jeu roghel tuts per perdun e la carezia da Cristus possi reunir nus tuts egl avegnir.» (Prelegiu el riug). Quels plaids sincers ed aviarts dil defunct plaidan per el e muntan per nus ina specia da testament.

Il luvrer nunstunclenteivel per la cultura romontscha

Sper sia gronda activitad claustrala e pastorala ei pader Vigeli Berther s'engascha cunzun per la caussa romontscha. En in necrolog ella Gasetta Romontscha s'auda ei da metter in ferm accent sin quei fatg.

Pader Vigeli ha entschiet a publicar per romontsch, sche jeu sbagliel buc, dils 1954 cun in artechel egl Ischi nr. 40 (1954) intitulaus «La claustra da Mustér e la Lumnezia». Già dils 1938 era cumparida ella revista per la historia dalla baselgia ina contribuziun tudestga dedicata alla retscherca da «Sogn Glieci». Il Bündner Monatsblatt da 1939 ha cunteniu buca meins che 3 da sias lavurs, era quel da 1940 (La veneraziun da s. Victor da Tumeigl), da 1954 (Habitadi benedictin en Lumnezia 1712-1755) e da 1956 (Administraturs da Rumein 1755-1955) cuntegnan lavurs da sia pleva. P. Vigeli vegn ad esser staus intimaus da perscrutar l'istoria da Rumein duront sia provisura da 1945-1951 en Lumnezia. Il Calender Romontsch da 1957 cuntegn igl artechel «Il sentir e patertgar dil pur muntagnard» cun ils sottitels: Senn per la famiglia, Il spert religios, La libertad. Il calender da 1959 ha purtau «Muntada dalla claustra», artechel integraus ella part tematica «Veta e cultura romontscha da 1859-1959», artechel che resplenda il patertgar religios, l'attaschonza e fideivladad a sia cara claustra. - Agl Ischi semestril, annada 60, nr. 4 (1975) ha il defunct surdau la contribuziun «Giachen Martin Hendry, in emigrant d'avon varga 100 onns ell'America». - Igl emprem cudisch pil scalem superior da La veta da mintgadi (1973) fa enconuschents nus cun il bibliotecari ed archivar ella contribuziun «Aventuras d'in miuret». Il secund cudischet pil scalem superior (1975) dalla medema ediziun porta ina translaziun d'in toc original dad Edith Piaf: Miu uffiern, il tissi enivront.

Las Annalas da 1969 (nr. 82) cuntegn ina contribuziun zun instructiva e bein documentada: «Pader Placi a Spescha e ses priedis». Ellas Annalas figurescha pader Vigeli aunc en in auter liug. El ha numnadamein cumpilau il register general dil calender «Il Glogn» 1925-1953 e publicau quel en las Annalas 78 (1965), squetsch separau ch'ins sa aunc retrer dalla Ligia Romontscha e che presta survetschs zun nizeivels. - A sia parentella ha pader Vigeli bein fatg in dils megliers regals, surdond la «Genealogia dalla famiglia Gion Fidel Berther-Hendry, Rueras, 1972» in'ovra zun apprezzada. Duront biars onns ei pader Vigeli staus promotur dall'academia romontscha «Il Curtgin». Il scribent da questas lingias ei staus actuar e president dil Curtgin e sa attestar ch'il defunct ei adina staus prompts cun plaid e cussegl per sustener nossa uniun studentica romontscha dalla claustra. - Pader Vigeli ei staus in commember activ e fideivel dalla Romania. El fuva per aschidadir il «delegau uffizial romontsch dalla venerabla claustra da Mustér» alla Romania ed alla Ligia Romontscha. Aunc da s. Stiafen 1977 eis el staus presents alla radunonza da delegai dalla Romania ad Uors e quei tochen alla fin d'ina tschentada da 4 uras. El ha cheutras documentau danovamein igl interess demussau già cun sias contribuziuns els organs dalla Romania. - Pader Vigeli ei staus ella cumissiun per l'ediziun dil

vocabulari romontsch sursilvan-tudestg da 1962. Cheu ha el saviu dar bunas informaziuns e pacificar mintgaton ils tgaus calirai. - Il defunct representava la scola media da Mustér en la conferenza da magisters da romontsch dallas scolas medias. Meinsvart era el cheu pli gigins e pli realists che ses collegas pli giuvenns. - Pader Vigeli ei staus in collaboratur fetg apprezziau e fidau dalla Gasetta Romontscha e dil Calender Romontsch. Ses temas preferi fuvan da tempra historica, locala (tuatschina), cultural-historica e claustrala.

Il redactur dil Pelegrin

Il schaner 1958 ha pader Vigeli surpriu la redacziun dil Pelegrin ed ha redigiu quel cun grond talent e talien tochen 1968. «Pader Vigeli capescha da tractar el Pelegrin damondas actualas dalla veta, da famiglia, scola e baselgia». (T. Berther). El engrondescha il diember dils collaboraturs, tacca temas pli moderns che fuvan stai plitost tabu tochen da cheu. El ha il cletg da posseder biars e fideivels colluvrs. Pader Vigeli ei in redactur nunstuncienteivel. Denter auter translatescha el ovras dil franzos, dil tudestg: Albert Seipolt (benedictin dalla Baviera) «La zanur dalla pleiv, In vicari e treis mattauns, Era ina femna sa gidar alla victoria», da Leo Tolstoi: «Tgei mantegn il carstgaun en veta?», da Maria Ebner-Eschenbach: «Crambambuli», da Caspar Freuler: Il cunti dil moni mellen. Il redactur fa alla fin da scadina annada in register dallas materias, el s'occupescha da problems da nossa populaziun.

Igl onn 1967, cura che pader Vigeli sesanflava el spital en consequenza d'in infarct dil cor (el sesenteva buca bein, ei vegnius cul tren a Glion, zuppegiaus or el spital ed il miedi ha constatau ch'il pacient hagi ual varghentau in infarct!) vevan las tgirunzas e soras buca bialaveta da tener en letg e da far ruassar il bien pader. Siu panzieri principal fuva la redacziun dil Pelegrin e buca sia sanadad; ina maschina da scriver ha stuiu neu ualti spert! Sur T. Berther ha exprimiu fetg bein la tenuta dil defunct en siu riug: «Il miedi admoneva el d'haver quita e seschanegiar. Denton seschanegiar, quei enconuscheva pader Vigeli buc».

Il custos dalla biblioteca romontscha claustrala

Dapi 1952 ha pader Vigeli Berther cuntinuau cun grond inschign la lavur dil fundatur dalla biblioteca romontscha, pader Baseli Berther (1858-1931) e da ses successurs, pader Ursicin Simeon (1866-1950) e pader Ambros Widmer. Pader Vigeli ha informau en in'emissiun dil Radioscola sur dalla biblioteca romontscha dalla claustra. Cu el hagi entschiet fuvien las crunas aunc miez vitas. Cun carezia, mo era cun egl tut special ha pader Vigeli capiu da fastisar, rimnar, cumpletar ed ordinar manuscrets, purgameinas, scartiras veglias, cudischs, gasettas, fegls sgulonts ed auter. Mintga 'trapla' vegneva urentada, rimnada ed arcunada: annunzias da naschientscha, hartas da morts (memorias), da messas nuvialas, da nozzas, giugs etc. Pader Vigeli ha luvrau e barhau per sia biblioteca cun in engaschament endinau, cun tgierp ed olma. Igl autur da quei necrolog ha giu la cuida e l'honor dad esser siu assistent en biblioteca durent plirs onns. El sa confirmar che pader Vigeli sesenteva cheu en siu element; la biblioteca romontscha fuva veramein sia «gronda pissiun», mo ina buna. Cheu tarlischavan ses egls da furbaz, cheu scheva el meinsvart cun in surrir malizius: «Enquera, mo enquera, ti vegns ad anflar! » (Ed jeu hai priu a pez sia admoniziun ed hai profitau da quella pissiun). Sia biblioteca romontscha astga valer per la pli impurtanta e completa biblioteca romontscha, silmeins per la part sursilvana, cunzun grazia a sia premura da furmicla.

Avon entgins onns ha pader Vigeli visitau in per da mias classas al Seminari scolastic. El ha presentau a nus sia ovra da veta, sia carezada biblioteca romontscha. Il bibliotecari ha giu in auditori fetg interessau. Cun differentas classas havein nus astgau admirar la biblioteca romontscha sin claustra. Pader Vigeli aveva per disa da mussar il pli grond cudisch romontsch (sursilvan), La s. Bibla (tut la sontga Scartira) da Stefan Gabriel (il giuven) e da Luci Gabriel da 1717-1719. Silla cuviarta da lenn da quella bibla fuva in text che pader Vigeli prelegeva mintgamai cun plascher, secrets cun letras grecas, mo en lungatg tudestg: «Jeu vegnel mai pli a beiber in sulet daguot en mia veta». Pader Vigeli scheva cun in rir malizius: Quei sto esser stau in um che veva tema dalla dunna, in bugliatg, perquei ha el scret cun letras grecas ses propriests, per che la dunna sappi buca leger e controllar. (Ei dess forse aunc autras interpretaziuns).

Il custos dalla biblioteca fuva senz'auter prompts da brattar cudischs: «Jeu brattel adina, sche jeu hai dublettas avunda, mo jeu vendel mai, per raps dun jeu nuot». Era quei bien principi ha enqual da ses fideivels discipels acceptau e praticau cun success. - Essend pader Vigeli bibliotecari romontsch dalla claustra eis el vegnius eligius - era cul sutsignau - en la cumissiun per la nova Bibliografia

retoromontscha. Cheu ha el prestau gronda e buna lavur e dau beinenqual cussegl che sebasava sin liunga experienza. - En «Aventuras d'in miuret» en la Veta da mintgadi descriva il bibliotecari pader Vigeli la biblioteca romontscha sco suonda: «Gia vesa il miuret tras ina fessa viaden egl arcun che cuntegn historia e sabientscha, letezia e tristezia, veta e mort da tschentaners e tschentaners. - Cheu schai in codex sin l'auter, cudischuns ligiai en curom e pergameinas e serrai cun fiblas e fivialas. Dasperas paradeschan en bi disuorden (!) fegls sgulonts, documents che relatan da dis d'armas e larmas, da lavinas e pupiras, mo era da fiastas e sulazs».

El survetsch dalla pastoraziun

Sco gia menziunau ei pader Vigeli staus da 1945-51 beneficiat da Rumein e provisur da Vignogn. Sur Tumasch Berther ha dau il suandont maletg dalla lavur pastoral dil pader defunct: «Sper il grond pensum da lavur en claustra va el dumengias e fiastas viado en las pleivs per gidar en la pastoraziun. Nus prendein forsa che quei secapeschi da sesez. Nus stuein denton patertgar che gest ils dis sco Nadal e Pastgas, cu in pader che dat scola havess - suenter in trimester da strentga lavur - basegns da ruaus, tucca ei ad el dad ir en ina pleiv e prestar gronda lavur, e segir tuorna el a casa fetg staunchels. Per quei survetsch pastoral che pader Vigeli ha prestau quels biars onns en nossas pleivs mereta el da spirituals e pievel in sincer engraziament. Il Segner vegli dar ad el la bein meritada pagaglia».

Aunc sur il davos firaus da Nadal fuva pader Vigeli staus - sco avon in onn - a Falera per prestar cheu il survetsch pastoral. Da Nadal ha el fatg in priedi da cuntegn veramein impressiunont e plein slontsch. Ei vegn ad esser stau il davos. Ses plaids plidai da cor ein i a cor; els han schau percorscher ch'in um profundamein religius e pietus sespruava da gudignar ils fideivels pil Segner.

Pader Vigeli valeva per in bien predicatur; ses priedis romontschs da Nossadunna pil meins da matg en claustra ein aunc en buna memoria. La baselgia claustrala fuva mintgamai fullanada. Cheu encurschevan ins che il defunct fuva encunter tut chichergnem dultschin religius, encunter tutta «sentimentalitat da femnas veglias». El aveva in pulit pezzi senn per humor e scheva magari: «In sogn trest ei veramein in trest sogn», ni «Mo buca prender il mund si dies, il mund po tener maneivlamein Vus, mo Vus buc il mund». - Pader Vigeli leva buca schar percorscher entras sia tenuta exteriura sia religiusadad interna. El saveva che mo Niessegner hagi da vegnir aduraus e glorificaus, el evitava scadina veneraziun ch'udeva buc ad in vivent, el saveva ch'igl entscheins s'audi a Niessegner e buca agl augsegner.

Sur fossa

Car amitg, pader Vigeli. Ti eis ius e lais anavos ina gronda largia. La claustra, Tes parents, il pievel romontsch deploreschan quella sperdita. Jeu hai pers in bien amitg e fideivel collega, in cussegliader experimentau ed aunc bia dapli. Ti vegns a muncar a biars en beinenqual situaziun. La claustra vegn ad haver grondas difficultads da serrar quella largia. Ti fuvas gie il pli giuven pader d'origin romontsch. Il fatg ch'ils dus auters paders romontschs han gia varghentau ils 70 vegn a far quitaus a monsignur avat.

Nus lein denton buca renfatschar a Diu ch'el ha priu da nus pader Vigeli, relativamein baul tenor giudicat human e quei ordamiez ina veta plein travaglia. Nus lein biaronz engraziar a Diu ch'el ha regalau a nus duront quei temps in aschi bien pader e luvrer premurau e cunscent digl agen duer. Persunalmein admittel jeu il meglier engraziament per tut quei che nossa amicezia da 20 onns ha cumpigliau.

Claustra, decanat, confrars, amitgs, students anteriurs ed activs ed igl entir pievel romontsch din a Ti persuenter in cauld e resentiu Dieus paghi. Vegli il Segner remunerar quei premurau e fideivel luvrer tschiendublamein. Nies bien pader Vigeli Berther ruaussi enten il Segner!

Isidor Winzap

Sur Flurin Venzin

CR 1981 pag. 395



Siu vegnir

Sur Flurin Venzin, in spiritual tenor il cor de Diu, ei naschius igl onn 1900 a Selva/Tujetsch, leusi ella tgeuadad della muntogna. Enserraus da teissas e malsegiras spundas che sburflavan savens lavinunas tochen giu tier il giuven Rein, periclitond la veta dil carstgaun muntagnard, ei sur Flurin tuttina sesviluppau ad in character aviert e grad, ad in giuven che veseva ton la bellezza della natira sco era la malignadad digl ambient. Cheu a Selva gauda il giuven Flurin el ravugl d'ina roscha fargliuns ina biala affonza, cheu frequenta el las scolas primaras, dal temps, nua ch'ins considerava aunc la naschientscha d'in affon per in eveniment e per ina grazia da surengiu. Tochen 30 scolars frequentavan da lezzas uras la scola da Selva, ferton ch'igl entir vitg ha oz strusch pli 30 avdents.

En la famiglia dil Flurin de Selva e da sia consorta Gada, nata Pally, da Camischolas, regeva il spert della tema de Diu, dell'oraziun e della sempladad cristiana. Quella tenuta ha accumpignau il giuven Flurin dalla tgina alla fossa. Denton aveva il veneratur della «Mumma digl agid de Selva» udiu da surengiu in auter clom muort urbida da Maria: Quei fuss miu giavisch ch'jeu damondel il Segner, quei ch'jeu tscherchel: Avdar ella casa dil Segner tut ils dis de mia veta; contemplar la bellezza dil Segner e star meditond en siu tempel. (Ps. 27). Bein sminava sur Flurin gia lu, ch'il spiritual stetti el center da treis ualti hanai rudials: baselgia, Cristus e mund. Plein speranza d'astgar survir inaga a quella baselgia, a quei Cristus, banduna Flurin Venzin Selva, siu carezau vitg nativ, serenda alla claustra de Mustér per frequentar per in onn leu ina classe della scola reala. Quei cuntentava buca el. El senteva pli e pli il clom de Diu alla clamada sacerdotala. El mida classe, empren latin, frequenta 5 onns gimnasials a Mustér per lura serender el collegi della «Mumma digl agid» a Sviz. Leu finescha el siu studi humanistic cun gl'examen de maturitad. L'elecziun della clamada ha buca caschunau grondas difficultads al premurau student; el veseva la gronda e biala raccolta ed ils paucs luvvers. Gl'atun 1922 entra Flurin Venzin el seminari de s. Glieci a Cuera e treis onns pli tard celebrescha el sia emprema messa nuviala ella parochiala de Sedrun. Siu bien e sabi augsegner, sur Hans Giachen Venzin, biars onns plevon de Sumvitg, ha assistiu a quella primizia sco bab spiritual.

Siu operar

Vargadas las festivitats della primizia cun fluras e tschupials, suondan las annadas della veta sacerdotala sil camp de lavur amiez il pievel cristian. Il spiritual vegn buca tarmess sco specialist viado ella vegna dil Segner, siu operar cumpeggia igl entir carstgaun: affons, giuven e vegl, umens e femnas, maridai ed isolai.

El sto saver dir cun s. Paul: Jeu sun daventaus tut per tuts (1. Cor. 9.22). Cun quei idealissem vegn il giuven della muntogna gl'emprem, tarmess giu el marcau grond de Turitg en la pleiv de s. Pieder e s. Paul. Quei ei bein stau ina cuorta provisura. Lu retuorna sur Flurin definitivamein en tiara romontscha. El vegn plevon da Sagogn, da Surcasti, dad Andiastr e caplon da Segnas. Igl onn 1926 ei sur Flurin entaus sco plevon ella pleiv de Sagogn ed exact 50 onns pli tard ha el, tenor siu agen scriver, celebrau sia emprema sontga messa sco resignat a Camischolas ella caplutta de s. Onna. (Duront 54 onns de veta pastorala ei sur Venzin vegnius accumpignaus e sustenius da sia sora Josefina sco casarina. -Quei ei in unic cass, che mereta renconuschienscha ed engraziament, era da vart della s. Baselgia. Ina buna e fideivla casarina ademplescha in grond apostolat della cuminonza). Denteren stattan ils 50 onns de lavur pastorala, onns da sulegl e calira, onns da quitaus e panzieris, onns d'immensa grazia divina. Sur Flurin havess saviu festivar solemnamein siu giubileum sacerdotale ded aur, mo ha preferiu de far quei en tutta tgeuadad. El ha mai encuretga las laudavaglias dil mund curcladas cul vel della gronda vanadad.

Sur Venzin ei staus in spiritual cun in bien humor, cun senn practic-pastoral ed era beinvegnius e beinvesius ella cumpignia dils confrars. Il svilup dil temps e las midadas saluteivlas liturgicas dil secund Concil dil Vatican han buca caschunau grondas difficultads agl augsegner aviert per tut bien,

che vegn dalla baselgia e survescha alla cuminonza. Siu optimissem e siu bien humor han beinenqual gadas alzau e dau forza al concarstgaun els quitaus e difficultads della veta quotidiana. Las delegaziuns dellas singulas pleivs cun lur bandieras han demussau stema ed undrientscha per lur anteriur augsegner, e la canzun dil chor-baselgia da Segnes ha commuentau ils presents.

Sur Flurin ha luvrau en ses giuvens onns intensivamein per las uniuns de giuvens, per la guardia de s. Gieri ed ha accumpignau grondas roschadas giuvens sursilvans als exercezis spirituals a S.Pieder (Feldkirch). Da Sagogn anora ha el - sco proviser - aunc pastoraun per temps la pleiv de Laax, dau instrucziun religiusa a Flem e giu quitaun pastoral e spiritual per las soras digl institut Löwenberg a Schluein. Il viadi da Sagogn a Flem hagi el adina fatg per pedes apostolorum, quei vul dir a pei. Da lezzas uras eran ils vehichels pli scarts che ozildi. - Sur Venzin ei staus in econom. Dapertut ha el giu quitaun per las baselgias ed ha bandunau las pleivs senza relaschar deivets. Quei scriva el cun ina certa luschezia en siu diari final.

Serasontga


Ils davos onns de sia veta ha sur Venzin passentau a Camischolas. Sia casa paterna a Selva era daventada gl'onn 1949 l'unfrenda dil barschament de Selva. Silsunter han ins puspei eregiu ina casa dils Venzins, mo quella, periclitada dalla lavina, ei vegnida translocada a Camischolas, e cheu ha sur Venzin passentau sia serasontga. 80 onns della veta terrestre han impregnau al defunct il patratg ed il maletg della vanadad dil mund, dil vegnir e vargar de tuttas caussas. Nus havein buca cheu nossa dimora, mobein tier Diu. En sempladad ei sur Venzin naschius e vivius, en sempladad e cuntentientscha ha el luvrau e pastoraun e dau siu bien exempel allas olmas confidadas ad el. En sempladad ha el plidau cun Diu ell'oraziun per el e ses parochians, ed en quella medema sempladad ha el dau sia veta anavos al Scaffider.

Il sacerdot defunct vegli implorar da Diu novas clamadas sacerdotals, novs pasturs dellas olmas per nossas pleivs romontschas. Quei tut ei stau il cuntegn dil bi riug de bara ils 15 de schaner 1980 a Sedrun - da sur professor Gieri Derungs della scola cantunala a Cuera. Cun gronda pietad ha el seregurdau digl operar dil defunct spiritual ed ha appellau al pievel ed als spirituals de rugar ed implorar da Diu benedicziun per pleivs e pievel. - Il defunct gaudi la glisch perpetna avon la fatscha de Diu. R.I.P.

Sur Christian Berther

Toni Hendry, Sedrun

CR 1983, pag. 411



La damaun dils 15 da fenadur ha el detg siper ils ses: «Neve ch'ei tucca; ussa stoi jeu far ad ir». Ed el ha buca calau da tener ils mauns da ludaus. Atgnamein ha ei giu num Gion Antoni; ins ha detg ad el ora ed ora Toni. Toni e nuot dapli; Toni ei stau dabia. - Toni Hendry ei naschius ils 27 da zercladur 1905 ell'ucliva da Cavorgia, la premgenitura da Barla Catrina, nata Peder, e Giachen Martin Hendry. La mumma veva spitgau vess igl affon, tertgond alla biala entschatta ch'ella hagi insumma buca da dar guoter ad enzatgi. La famiglia ei sefatga ed ins ha fatg lartg per ina gronda casada. Il Giachen Martin pinava buca mo iseglia, el cuntschava era ils calzers e las cazzettas. Dad el ha il Toni artau siu maun inschignus; el dultitava bein e vess dau in prima mistergner.

El sescolescha

Igl ei da supponer ch'il ménder da Cavorgia veva giu priu a pez il cussegl dil Giachen Martin. Per far il davondavos tarmetta ins buca il premnaschiu giu Cuera el seminari da scolasts. Siu conscolar Alfons Maissen di ch'il Toni fuvi in scolar uert ed uerbel che fagevi per camond e suandavi bein las lecziuns. El savevi esser anetgs en sia reacziun e da l'autra vart fidaus ed attaschus sco bunamein negin. Ils anno 1925 tuorna Toni Hendry a Cavorgia cun buns attestats e la piazza ei garantida. Ils umens dil

cussegl han mess el ordvart, dadens igl uaul, enamiez ils Tarleps. A Selva ha el stuiu emprender per da detschiert e dasperas ha el aunc gudignau giu las cordas da caporal. Duront la stad s'engascha el sco survigilader dalla lingia da viafier dall'Alpsu. Mo gliez quei leu fuva per cass mulin e muliniala ed enqual dils onz pli levs han perfin entschiet a mirar uiersch. Ton ch'il mat da Cavorgia fuva vegnius ualti spert in um dad aspects.

A Sedrun

L'entschatta si Selva ei tuttavia buca stada fallida ed ils cusseglers ein i per el; ils scholars dalla scola superiura a Sedrun fetschien pretensiuns ed el hagi da star leu davontier. E leu eis el staus ditg davontier, 45 onns, sils scalems da differentas classas. Adina denton francs e segirs e cunscients. Sia istruzziun fuva clara e capeivla ed el deva ina buna gramatia romontscha e tudestga. En quen fuva el en mintga cass in specialist. Igl inagain e las quater operaziuns stuevan seser sco fier.

Il bab a Cavorgia era vegnius malsaus ed el sto murir avoncaduras. Al Toni ha ei tucbau da sorprendre il tgamun; el ei semess a per cun la mumma e siu plaid ha entschiet a valer enstagl da quel dil bab. Tschun frars e quater soras, quei fuva dabia e la plipart aunc miez miur e miez utschi. Ed el sez ha giu dad ir ordavon cun il bien exempel; quei ha el fatg ed ha rabbitschau pruamein ils raps a casa, alla famiglia che veva da basegns.

Ei fuva onns nauschs ed ins risdava stediamein dall'uiara.

Sin Gonda, osum il Drun, veva il Toni cumprau ina casa resch nova e la mumma ha ugliu el da maridar. Entochen ch'el ha maridau la giuvna Barla Monn; ella ei stada ina buna consorta e mumma da ses tschun affons. Il Rico ei morts dad affon pign ed ils auters quater han tuts dau pietigot e sedostan bein egl jester. La Barla perencunter ha priu igl ur dil tschos ed ha furschau ils egl. Ella ha stuiu prender la disa ed enstagl ha ella era giu bien quita dad els ordeifer e surtut da siu um entochen il davos, dad el che leva nungrazia ir naven e pils spitals.

En vischnaunca

Forsa ch'il Toni Hendry vess saviu sefar pli fetg vitier; el ha denton buca vuliu s'avanzar e sefar valer sin vischnaunca. Enconuscheva el sesez e ses cunfins? Igl ei da crer. El saveva numdadiu buca far il leischen cun enzatgi. E perquei ch'el saveva buca far ina fatscha leischna eis el staus vid siu laisch. Buca ch'el vess snegau in survetsch a ses convischins, aschia ch'el ha da giuven enneu acceptau dallas uisas scharschas e sco president dalla cumissiun da gestiun eis el staus curaschusamein alla testa. Dil pli grond plascher ha il Toni giu da sia elecziun dad archivari dalla vischnaunca da Tujetsch. Cun in tschaffen nundetg eis el semess vidlunder ed ha scarpliu las scartiras, nudau ils documents e cavigliu a scret tut manedlamein. El veva dapertut in uorden exemplaric ed ina scartira admirabla. Jeu tratgel che mistral Teofil Schmid hagi mess savieivlamein e gestamein ils accents en siu necrolog dalla Gasetta Romontscha.

Igl um dalla cultura

Toni Hendry ha giu bugen sia derivonza ed ei staus encunter la decadenza dils usits. Ch'il scolast steva da lezzas uras davontier allas uniuns, quei fuva bein da secapir e natiral ed ins saveva gnanc grau persuerter. Oravontut daventa el dirigent dil chor viril e scochemai sissu ha el da sorprendre la direcziun dil chor da baselgia e quei ord ils mauns fermes dil farrer (da sur Giachen Antoni Fetz). Surprender e stgavo! Buca ch'ils geniturs u ils uauls da Cavorgia vessien giu dau agli duns specials sco cantadur e musicant. Alluscha gliez bein - e quei ei puspei simtomatic per Toni Hendry - cun ina premura nundetga contonscha el ina habilitad da sunar e cumprender las notas. Tgi ha nudau las uras ch'el ha studegiu las messas e las canzuns e scret entirs cudischs da notas? Jeu tratgel ch'el hagi buca desiderau ch'enzatgi demuossi agli engrazieivladad. E tuttina stoi jeu dir ch'el eri fetg engrazieivels per il pli petschen plaid da renconuschientscha.

Dil Giachen Martin da Cavorgia veva el empriu da tener adaquen e negin vegn a snegar ch'el fuvi in prima quintist. Dasperas veva el e dun da lungatg. Toni ha legiu bia, tudestg e romontsch e las publicaziuns romontschas enconuscheva el da rudien. Ei fuva daveras interessant da discuorer cun el dalla litteratura. O, el veva siu meini precis e schanegiava era buca il Vic ch'el veva pigl auter ualti bugen. - Toni Hendry ha buca mo translatau Geremias Gotthelf e biars biars teaters e silsuerter fatg il regissur, el ha e sez scret ils fatgs dalla val e quels dall'ucliva e perfin dabia poesias. Lasezzas veva el adina zuppau giudem il truchet ed ei ha adina tucbau da pluminar, avon ch'el ruchegi neuadora cun


enzatgei. Allura rieva el surlunder. Da sesez veva el buca in bien meini; el fuva nauschs e rigurus cun sias fleivleziass.

A ses affons ha el buca vuliu dar num Toni; a mi ha el detg repetidamein ch'ei basti cun in Toni Hendry. - Uss eis el ius naven per adina. El ha fatg lartg en casa, sin Gonda ed en vischnaunca; sias passidas san ins buca surveser. Als ses, oravontut a sia cara consorta Barla lein nus dar omisdus mauns e dir da ver curascha. Cun el sez vegli il Segner far misericordia e dar agli la pasch ch'el ha desiderau fetg.

Vic Hendry

Vigeli Berther, Sedrun/Camischolas

CR 1989, pag. 415



Ils 14 d'october 1987 ha il Tutpussent clamau siu fideivel survient Vigeli Berther. Gest quei di vess el giu la cuida ed il plascher da festivar siu 65avel di da natalezi. Mo quei ha buca dui esser. Entgin temps avon era el vegnius taccaus d'ina maligna malsogna che ha plaun a plaun consumau las forzas d'ina natira da fier. Il defunct ha surportau las dolurs e la tortura cun pazienza e grondezia humana.

Ils 17 d'october 1987 ha in imposant conduct da bara accumpignau president e deputau Vigeli Berther al davos ruaus sil santeri da sogn Vigeli a Sedrun. La cuntrada ei sclarida e sepresenta ella pumpa digl artist atun. Ei ha vuliu esser aschia per ch'il cumiau da scolast secundar e president communal sepassi avon ils egls da tut la Val Tujetsch. Il Chor da baselgia ha embelliu las funcziuns funeralas e documentau cheutras tgei stema ch'il defunct gudeva en sia val. Igl ei stau in beinmeritau Dieus paghi per tut il bien ch'il defunct ha prestau durent dis ed onns per la scola secundara, per sia vischnaunca e per il Cumin.

Sur Giusep Cathomas, il plevon da Sedrun, accumpignaus da plirs confrars, celebrescha in edificont survetsch divin. Sco adina anfla el plaids beinfundai per skizzar la veta e l'activitad dil defunct sco persuna da buontad ed attaschadad per sia famiglia e per l'entira cuminonza. President communal Gion Beer presenta las activitads dil defunct Vigeli Berther sco president communal e deputau. Ils numerus representants dallas autoritads politicas communalas, circuitalas e cantunalas demuossan ch'il defunct fuva stimaus e respectaus tier ses anteriurs collaboraturs e superiurs. Ils dus davos onns ha el - muort sia malsogna - remess in uffeci suenter l'auter. President communal Gion Beer menziunescha ch'il defunct seigi buca adina staus in emperneivel partenari. Mo el tonscha il maun da pasch al preziau e stimau convischin defunct engraziand per tuts survetschs prestai alla vischnaunca ed al cuminetel.

Derivonza ni origin

Vigeli Berther ei naschius ils 14 d'october 1922 a Camischolas sper la caplutta da sontg'Onna sco 10avel affon da vegl mistral Vigeli Berther-Flury. Ensemen cun ses 11 fargliuns crescha el si en ina famiglia cristiana. En ina tala truscha ha il defunct stuii emprender ad uras da sedustar e sefar vitier. Las scolas primaras ha el frequentau a Sedrun e la scola secundara all'«universitad» a Camischolas. La casa da scola per la scola secundara sesanflava lu a Camischolas per survir meglier all'entira val. Durent las liungas vacanzas vev'ei num far il fagot ed ir en piazza per luvrar e gudignar. Mo era durent il temps da scola veva mintga affon siu ressort da lavur. Ei tuccava da pover las nuorsas ni las cauras ni era fender e purtar lenna. La lischentadad era - tenor meini dils geniturs - la fontauna dils vezis. Igl onn 1938 anflein nus Vigeli Berther sco practicant ella scola purila al «Plantahof». Quei contact cullas differentas lavurs d'agricultura ha svegliu senn e capientscha per ils basegns dil puresser ed el ha pli tard defendiu cun fervur ils interess dils purs. En in marighel da 12 affons san buca tuts far il pur, e perquei serenda il talentau giuven el seminari da scolasts a Cuera ch'el terminescha igl onn 1944

cun la patent da scolast primar en sac. Scolasts dev'ei da gliez temps la fuortga pleina ed el ei staus leds sco in'olma d'astgar surpender la scola cumplexsiva da Selva 1944/1945 ed igl onn 1945/46 la scola cumplexsiva da Cavorgia. Tenor ina lescha naturala stuevan ils giuvens scolasts smuttar lur corna ella periferia dalla vischnaunca. Mo quei ei nuota stau donn da viver empau ell'isolaziun, viver el prighel e sentir ils disavantatgs digl abandun per endriescher tgei che basegna.

Suenter dus onns da practica en scola primara serenda Vigeli Berther a Friburg e daventa scolast secundar. 1947-1949 instruescha el ils scolars dalla scola secundara a Lumbrein. Igl onn 1949 daventa el scolast secundar a Tujetsch. Dapi lu magistrescha Vigeli Berther en sia vischnaunca burgheisa, gl'empren a Camischolas, lu a Rueras e dapi 1962 ella nieveregida casa da scola a Sedrun. Duront la stad 1947 frequenta el in semester all'universitad da Perugia. Perquei dominava il defunct Vigeli fetg bein il lungatg da Dante. Silsuenter serenda el duront duas stads a Paris per seprofundar el lungatg franzos. Quellas dimoras egl exteriur han aviert igl egl per dimensiuns e relaziuns pli vastas. Igl onn 1956 siara Vigeli Berther la ligia per la veta culla giuvna Tresa Jacomet, feglia da vegl president communal Placi Jacomet. Lur letg vegn benedida cun treis fegls. Ils premurai geniturs procuran che scadin sappi sescolar ni absolver in emprendissadi. En quei ravugl famigliar ha il defunct adina puspei cattau la forza ed il sustegn necessari per sia viva lavur publica.

Scolast secundar ed um da cultura

40 onns ha il defunct instrui e formau giuvens carstgauns. Sia instrucziun era - sche zaco pusseivel - adina cumbinada cun la veta pratica. Aschia cattav'ins savens scolast secundar Vigeli a mesirond praus, buoras ni il volumen dallas fontaunas el vitg. Bandunond la scola, stuevan ses scolars era enconuscher enzacons tozzels da nossas flurs alpinas. Las lecziuns preferidas dil defunct eran las uras da zambergiar culs buobs. Cheu capeva il defunct d'influenzar ses scolars per las bellezias manualas. Jeu crei, ch'el enconuschevi tuttas specias da lenn. Entagliar e dultgar scaffas e scaffettas, truccas e truchets, uoppens ed uras eran in hobi, ina pissiun. Cheu veva il Tuptussent regalau al defunct in dun special. Sper la scola ha Vigeli Berther era contribuì sia part a nossas cuminonzas culturalas. Aschia eis el commember d'honor dil Chor baselgia ed in fideivel commember dalla Societad da musica.

En survetsch dalla cuminonza

Duront onns e decennis ei Vigeli Berther s'occupaus intensivamein cun ils fatgs publics. Quasi parallel cun sia veta privata e professiunala va sia activitad publica. Sco scolast sesenta el obligaus da dar niev impuls alla veta culturala, sociala ed economica. Jeu crei, ch'jeu sbagli buc, sch'jeu ditgel che la politica hagi fatschentau il defunct ton sco sia veta professiunala. 1971 daventa Vigeli Berther president communal. Cun tschaffen e perschasiun surpren el il guvernagl dalla vischnaunca da Tujetsch. Diesch onns ha el giu e teniu il guvernagl cun maun franc. Sia mira principala ei stada: la protecciun digl ambient ed il manteniment e la tgira da nossa biala Val Tujetsch. Tenor il cudisch «Tujetsch», cumpariu 1987, stat il defunct botta, naturalmein cun ses consuprastonts, per las suandontas decisiuns:

- ina nova constituziun communal
- separaziun dalla vischnaunca politica da quella dalla pleiv
- prolungaziun dil temps da scola sin 40 jamnas
- Tujetsch daventa commember cumplein dalla Corporaziun da vischnauncas Surselva
- la pladida d'in miedi stabel en Tujetsch
- erecziun dall'ovra electrica Val Giuv
- canalisaziun generala e serenera
- vias pils uclauns: Selva e Maunsut (Surrein e Cavorgia)
- Tgesa communal e localitads da schurmetg a Sedrun
- cumpra d'ina casa pil museum da Tujetsch, numnaus la «Truaisch».

Alla fin da sia activitad politica sin terren communal daventa Vigeli Berther deputau. Leu ha el dau il stausch decisiv per la via da Cavorgia, ei s'engaschaus zun fetg per il stradun Mustér-Sedrun e per las tariffas da transport d'autos cun la viafier sur il Cuolm d'Ursera.

Vigeli Berther ha ussa bandunau nus per adina. Nus admettein in cordial Dieus paghi al defunct per sia vasta activitad professiunala e politica. Alla preziada consorta, als fegls ed allas famiglias en malencurada esprimin nus sincera condolientscha. Al preziau defunct Vigeli detti Dieus la pagaglia

perpetna. El ruaussi en pasch!
Leci Jacomet

Mistral Theofil Schmid, Sedrun

da mistral Faustin Carigiet
CR 1991, pag 404



Theofil Schmid ei naschius ils 16 d'october 1912 a Sedrun. Sco fegl vegl d'ina numerusa famiglia da 12 affons ha el frequentau leu la scola primara e secundara. El empren latin tier sur Fetz, sescolescha vinavon ella scola claustrala a Mustér ed acquista 1933 el collegi a Sviz il diplom mercantil. Mo el temps da crisa e disoccupaziun era ei buca lev d'anflar lavur cuntenteivla. El sedecida 1937 per ina midada professiunala e banduna 1939, igl onn dall'entschatta dalla secunda uiara mundiala, il seminari cantunal a Cuera cun la patenta en sac. 1944 meina el la giuvna Marta Valier agl altar ed ord lur ventireivla letg sorteschon 5 affons: 3 buobs e 2 buobas, oz tuts sur sesez.

En survetsch alla publicitad

Dond in sguard anavos el passau dil car defunct, savein nus mo retenir fragments da tut sia lavur prestada. La liunga gliesta d'uffecis, d'activitads e da survetschs prestai al concarstgaun ed alla publicitad dattan perdetga d'in fritgeivel operar en uniuns, pleiv, vischnaunca, cumin e Cantun.

En vischnaunca

La gronda lavur ed igl engaschi da president Theofil Schmid per la vischnaunca da Tujetsch meretan da vegnir menziunai. Cun 51 onn daventa il trapassau president communal dalla gronda vischnaunca da Tujetsch ch'era en cumplein svilup turistic ed economic. Sut siu tgamun vegnan impurtonts projects realisai: Las plantaziuns e lavineras a Scharinas e Nirièl, la cumpra ed erecziun dalla casa da vegls s. Vigeli a Sedrun, la sorprendida dall'Ovra electrica entras la vischnaunca, la decisiun concernent l'arrundaziun e la meglieraziun, la planisaziun zonala, il francar ils necessaris credits per l'erecziun dalla halla da bogn, per menziunar mo las pli impurtontas decisiuns. Bein in'activitad stentusa che pretenda in inschign special ed ina perseveranza endinada.

La vischnaunca da Tujetsch renconuscha quei grond engaschi cun eleger Theofil Schmid 1973/74 sco empren president dil niev Cussegl da vischnaunca.

En pleiv

Sco president dalla pleiv da Tujetsch stat mistral Schmid era buca lischents: La pleiv survegn ina nova costituziun. Per il Cussegl pastoral vegnan ils statuts elaborai e la baselgia parochiala a Sedrun e duas capluttas - quella da s.Brida e s.Bistgaun - vegnan restauradas.

El Cussegl grond

Igl onn 1965 elegia il pievel dil cumin dalla Cadi president communal Theofil Schmid el Cussegl grond, al qual el appartegn 16 onns. Beingleiti acquista el la stema dil parlament cantunal che confida ad el il presidi da differentas cumissiuns. Cun ina detschartadad marvegliusa e cun grond success representa el a Cuera ils interess da nies Cumin. Gia igl empren onn fa el al plenum l'emprema damonda per la slargaziun dil stradun Mustér-Sedrun. 1968 suonda la secunda damonda per il tschancun Sedrun-S. Brida, 1969 ina tiarza en caussa. Finalmein accepta il parlament cantunal 1971 unanimamein siu postulat pertuccont il stradun Mustér-S.Brida.

Cun la medema vigur renda deputau Schmid attents il Cussegl grond sin la viafier dalla Furca-Alpsu. Da quei dattan sia interpellaziun partenent la megliur tecnica, lu siu perschudent referat concernent la concessiun da credits per la viafier Furca-Alpsu, perdetga. - Pil schurmetg dalla via dil Lucmagn tschenta el 1967 ina damonda alla Regenza concernent l'erecziun da gallarias e lavineras.

Al cumin

Igl ei buca da smarvegliar ch'ils votants dalla Cadi surdattan igl onn 1971 a deputau Schmid il desiderau uffeci da mistralia. 4 onns empeila el il Cumin cun distincziun. Sco derschader singul relai el

en quei interval numerus mandats penals, tractescha - ensemen cun la Dertgira - ulteriurs cass e prepara ina summons da disposiziuns sil sector civil. Sia gestadad sco derschader ei mai stada en dubi. Duront sia perioda d'uffeci ha il suveran dalla Cadi demussau en la votaziun dils 3 da december 1972 eclatantamein ch'el vegli mantener vinavon la tschentada da cumin. Quella decisiun perschudenta ei d'attribuir per gronda part a mistral Schmid, che ha - encunter gronda opposiziun - defendiu la tschentada anoviars cun ruasseivladad, bia prudientscha e capientscha. Savend ch'in precis concept dall'organisaziun circuitala e dallas cumpetenzas e duers dils organs e dallas autoritads seigien l'emprema premissa per in fritgeivel e cuntinuau agir communabel eifer il cumin, lai mistral Schmid - cun consentiment dalla Dertgira - elaborar ina constituziun per il cumin dalla Cadi. Quella cumpeglia tuttas determinaziuns per fatschentas da natira politica, administrativa e giudiziala. La presentaziun al suveran da quella ovra d'impurtonza vitala ei fetg hanada e delicata. Mistral Schmid posseda denton ils duns e la confidanza indispensabla, aschia che vontantas e votants approbeschan ils 14 d'october 1973 cun in resultat excellent il sboz per l'emprema constituziun circuitala. Differents cumins, che han ils davos onns francau lur dretgs e duers, han applicau sco model la fuorma da nies cumin. Medemamein sebase la creaziun dall'ugadia uffiziala Surselva sin l'iniziativa da mistral Schmid. El ha renconuschiu la necessitad da quell'instituziun, che survescha a quels concarstgauns che han il pli da basegns digl agid.

La clamada

23 onns da si'activitad dedichescha scolast Theofil Schmid alla scolaziun dils affons da sia vischnaunca - igl empram a Cavorgia e lu a Sedrun. El medem temps s'engascha el era cun anim per las uniuns culturalas. Buca meins che 37 onns eis el commember activ dil chor-baselgia da Sedrun. La musica instrumentala ha el diregiu da 1939 entochen 1963. - Allas damondas sil sector da scolaziun renda mistral Schmid vinavon si'attenziun. Aschia appartegn el da 1968 entochen 1978 all'impurtonza cumissiu cantunala d'educaziun. - La fascinaziun da Theofil Schmid per l'economia e siu svilup - oravontut per quellas en sia zun carezada Val Tujetsch - ha segiramein pegliau ragisch en la buna scolaziun mercantila, che Theofil Schmid haveva contonschiu cun il diplom. Perquei s'engascha el cun gronda savida e bien success per in sanadeivel svilup economic e turistic dalla Val. Duront 1/4 tschentaner fa el part dil cussegl d'administraziun dalla Cassa Raiffeisen, Sedrun, ei president dalla centrala da latg, dalla corporaziun digl acquaduct Sedrun e cassier dall'uniun da cura e traffic, ei president dil club da skiunzs, cassier e president dalla societad da runals, Tujetsch. El daventa commember dall'impurtonza cumissiu per las contractivas cun la NOK concernent la concessiun dallas auas, fa part dalla cumissiu da spital el temps dallas preparativas per l'erecziun d'in niev spital regional a Glion ed ei suprastont dalla Pro Surselva. Tut incaricas e scharschas che vegnan remuneradas sil pli cun in Dieuspaghi. Il da viver - sco nus schein - gudogna il trapassau, suenter ch'el ha calau da dar scola, sco meinafatschenta dall'interpresa Murer SA a Sedrun. Sin quei camp da lavur essan nus s'entupai gia all'entschatta dils onns 60. El cuntinuau contact amicabel hai jeu empriu d'enconuscher Theofil Schmid leu, gest aschi bein sco en la politica. Per mei daventa igl um gest, conciliant ed amicabel igl exempel.

E co vess ei saviu esser auter tier mistral Theofil Schmid! Sco um cartent e fideivels all'ierta dils babuns eis el era s'engaschaus en la partida cristiandemocratica ed ha defendiu cun lezza ils dretgs humans, ton per giuven e vegl sco per um e dunna.

Tons e tons espriman a mistral Theofil Schmid in engraziament resenti per si'activitad admirabla. Da quei dattan las numerusas visetas da condolientscha perdetga aschibein sco la participaziun dallas delegaziuns da tuttas uniuns, dalla pleiv e vischnaunca, dil cumin e cantun e d'in pievelun en malencurada, alla sepultura. Theofil, ruaussa en pasch!

Pader Placi Berther OSB
da P. Ambros Widmer, Mustér
CR 1994, pag. 362



Nus quintein da buca ver giu tonta glied ad ina sepultura en claustra dapi la mort da pader Maurus Carnot 1935 sco gliendisdis, ils 7 da zercladur, cura che nus vein accumpignau pader Placi al davos ruaus. Ins duess buc entscheiver in necrolog cul past funeral, mo igl ei stau significativ pil defunct, che denter ils 133 «hosps da marena» eis ei stau in grond diember da muniessas da Müstair tochen Mustér.

Veta

Flurin Berther ei naschius a Rueras ils 27 d'october 1904, entra en scola claustrala igl onn dalla grippa 1918, fa la matura a Sarnen, celebrescha il profess benedictin a Mustér ils 1 d'october 1927 ed entscheiva, suenter la teologia a Salzburg ed Engelberg cull'ordinaziun sacerdotala ils 14 da matg 1931, sia reha veta monastica e pastorala. Ils dus sogns romontschs, sogn Flurin da Ramosch e sogn Placi da Mustér, accumpognan il giuven pader.

Il trapassau vegn engaschaus ella scola e dat grec, religiun, franzos, contabilitad e talian. Als novizs docescha el romontsch ed als fraters 1932-1938 dretg canonic. El seretrai dalla scola definitivamein igl onn 1967. Duront duas liungas periodas surpren nies confrar igl impurtont uffeci da statalter: 1934-1940 e 1952-1974. Da 1940 tochen 1952 ademplescha el il post da spiritual ed administratur ella claustra dallas muniessas benedictinas a Müstair. Suenter la mort da pader Vigeli Berther surpren pader Placi 1977 la Biblioteca romontscha, nua ch'el lavura tochen sia mort.

Engaschi

Las cefras numnadas da sia veta cuntegnan immensa lavur e premura nunstunclenteivla. Sco perdetgas da siu engaschi sco statalter stuess ins «clamar si» ils fumegls, emploiai, impressaris e las autoritads da pli baul. Quels savessen raquintar massa caussas e descriver p. ex. il svilup ell'agricultura, dil sistem vegl alla modernisaziun e motorisaziun hodierna. Tgei lavur pil statalter da baghegiar clavau e nuegl vi Salaplauna, mo era per star en e defender dretgs ed alps. Beinenqualga ina incumbensa zun heiclia. Cun prudientscha e zaiadad tuatschina ha el sligiau quels problems.

A Müstair ei pader Placi zun activs ella restauraziun dalla baselgia. Cun agens mauns ha el duront jamnas luvrau als frescos carolings. Per siu engaschi ha pader Placi survegniu la honur da burgheis da Müstair 1951 e da Muster 1976.

Il secund camp da lavur ei stau la pastoraziun. Con bugen eis el ius per gidar ora ellas pleivs e dad emblidar in tec ils quitaus dall'administraziun. Sco spiritual eis el staus egl element e quei en quater direcziuns. El ha pastoraui tier las muniessas a Cazas, Tavau, Glion, eav. Tier el han las soras anflau in spiritual da confidanza e consolaziun. La secunda «clientella» ei stada la «caritas» per ils malsauns. Cun ina memoria particulara seregurdava el da quels che pitevan e suffrevan. La tiarza activitad pastorala daventa - sco gia menziunau - ellas pleivs digl entir cantun. Duront meins ha el remplazzau augsegners p. ex. en Tumliasca e si Surmir, ei staus spiritual els spitals da Cuera e Glion. La quarta pastoraziun schai el misteri dil sacrament dalla penetienza. Aunc cuort avon la mort ha el dumandau mei: «Veis giu glied el confessiunal da Tschuncheismas?»

Sil camp cultural ha pader Placi luvrau bunamein mintgadi ella Biblioteca romontscha, ha catalogisau, ordinau, empustau e pagau! Igl ei stau zaco trest da veser co nies confrar ha dau giu quei uffeci pass per pass. El ha mess en retscha las dublettas dil Glogn, supplicau da buca purtar pli cudischs e documents, buca pudii leger la Gasetta Romontscha ed in cert di remess la clav dalla Biblioteca al pader decan.


Finale

Cun raschun ha il pievel ludau la buontad da pader Placi, mo el saveva era esser detscharts e critics e ha fatg valer siu meini en numerus cerchels. La vegliadetgna ha lu mitigau e nivellau. Bugen ha el retschiert visetas da confrars e dalla parentella e ha strusch refusau ina buna tschugalata. Cun gronda devoziun ha el concelebrau alla messa conventuala e sco grond veneratur dalla Mumma dalla misericordia han ins viu el ella baselgia da Nossadunna. Cun pader Placi va bia oraziun en fossa. Nus sperein che sia intercessiun detti alla claustra novas clamadas ord tiara romontscha. La generaziun pli passada vegn buca schi spert ad emblidar quei conventual plein premura, oraziun e carezia proximala. Requiescat in pace.

Francestg Berther, Rueras (1906-2000)

da Vic Hendry

CR 2001, pag. 411



Francestg Berther ei morts ils 23 da fenadur 2000 en la Casa Sogn Vigeli a Sedrun, naschius e morts pressapauc enten tucar d'avemaria. La Val Tujetsch, oravontut il vischinadi confortabel da Rueras - els han ina gronda perdita. Schi lev eis ei buca da metter giu sin ina buccada pupi il cuors da sia veta, ina veta da 94 onns. - Aschi mo per dir; nus essan cusurins. Ed enaquella ch'ins ei dalla medema era, s'enconuschan ins bufatgamein. E pervia dalla recliadad tuccha ei da schar valer che nossas ideas seigien buca idas schi bein a prau. Culs onns ha la veta mulau ora las furschallas. L'aura dalla sera ei stada emperneivla. Aschidadir en vesta dils sforzs communabels e targend en consideraziun las pintgadads dalla cumedia humana.

Francestg Berther ei naschius calonda uost 1906 - duront la rendida dil sulegl, daferton ch'ina autra cazzola ei s'enviadada, ina che ha vonzeivi fatg tscheccamein clar. Il bab Gion Fidel Berther da Rueras e sia consorta Mariuschla, ina nata Hendry da Cavorgia, han cavigliau il dieschavel promptamein en tgina. Il pop ei sefatgs e daventaus scochemai in buob hurti e cul tgau sisum. Ed igl ei probabel che ses duns ein dai els egls gia duront ils onns da scola a Rueras e silsuenter sco scolar dalla «scula naira» a Camischolas. En mintga cass daventa el in studetgel dalla emprema latina on claustra. Cumpatg che la scola claustrala da Mustér ei buca vegnida a ste dad ademplir per propi ses giavischs. Enstagl da turnar a Mustér, va Francestg Berther a Surcuolm e gida siu frar pli vegl, il Luis, en ina puraria. Il contact cun ils agricolans dil liug e buca il davos cun ils Gualsers da Sursaissa slargan considerablamein ses pugn da vesta. Buca mo il lungatg tudestg, biaronz tut quei che secatta davos il plaid. Aschia ch'igl ei iu sco da beiber aua dad ir suenter sis onns ella Bassa, ella Bassa sco fumegl e mulscheder. E cheu sei da metter vitier ch'il Francestg Berther hagi empriu bein d'articular il tudestg, ina caussa ch'el ha e impundiu silsuenter enten applicar il lungatg mumma.

Ils anno 1931 miera il bab Gion Fidel; ei fuva stau siu giavisch ch'il Francestg tuorni, semetti en cun la mumma Mariuschla e fetschi il pur. Ed il fegl ha suandau l'ordra dil bab. Cun in fatg sempel e manechel ha el entschiet. Persuenter veva el empriu in entir tschuat egl jester, tondanavon ch'el ha saviu star a disposiziun als purs, buca mo sco suprastont dall'Uniun purila. Entochen ch'el ha schizun empruau cun la pomicultura, giudem sin la ravera dall'aua dalla Val Giuv. Il vent criu dallas vals enviers mesanotg han fatg in streh atras il quen.

E quei astgan ins dir maneivel; Francestg Berther ha cattau ina dunna bunamein avon igl esch-casa. Enten la Benedicta, la feglia dil pur e negoziant ed anteriur president da vischnaunca, il Vigeli Venzin, ha el giu ina dunna zun premurada e d'ina prima pasta.

Els dus ein semaridai igl onn 1938. Enteifer ils onns ei la famiglia vegnida gronda ed ina casada da 13 affons ha num vus. Il bein puril ei restaus pignets - la promtezia e la fidonza - las ezzas ein vegnidas grondas. Enaquella che omisdus han tratg ulivamein, schebi ch'il dumpergi cun siu discletg e ses unviarns han tuttavia buca schanegiau els dus.

Stat bein si per la detta.

Francestg Berther cun siu meini aviert, meinsvart insistent, ei daus els egls a ses convischins, a quels dadens ed a quels dado il Dutg grond. Scochemai ha el surpriu la presidenza dalla secziun dalla Cassa

da malsauens Cadi. Ultra da tut siu menaschi ha el fatg genau da vischnaunca e suren aunc treis biennis derschader circuital.

Leger fa vegnir gronds.

E damai che leger arva dallas uisas portas - ha il Francestg Berther legiu e legiu, gasettas e brochuras per esser sil current - ed ina pluna cudischs, oravontut instrucziun ella historia. Forsa che mo paucs han giu ina survesta sco el en la historia locala. El - cun siu ordvart bien dun da secommunicar ha era anflau immerdiat tedladers, affons e la glieud carschida. Jeu schess schi da num ch'il Francestg Berther ei promptamein daventaus enzatgei sco ina instituziun cun ina mitologia privata. E buca mo ils avdents dalla val ein vegni per tedlar, biaronz glieud d'ordeifer e gnanc il davos buc ils paders ed ils fraters dalla claustra da Muster. Insumma - cun il convent ha el giu ina relaziun tut speciala.

Ei bein evident.

Sias buobas e ses buobs han profitau dil bab che ha saviu dir si entiras historias a casa e sco pervesider - epi oravontut si mises, aschidadir las uras ch'el ha dau peda si Liets, in liug cun ina perspectiva magnifica. Da Liets anora ha il Francestg Berther empriu da mirar e da veser - buca mo igl eldorado da Tujetsch, mobein e la via stretga che tonscha vi tier igl empermer carstgaun.

Igl ei da supponer fetg ch'il bab hagi mess sut ad uras ses affons e matei strusch senza ina certa rigurusadad. Pudess esser maneivel - cunter cor!

Malgrad la truscha ed ils dels numerus dalla famiglia, ha il Francestg Berther mess giu screts, principalmein per el sez. Bein mo sapocu enzatgei en la gasetta, schizun poesias.

Fuss pusseivel ch'el ha spitgau vess da surdar il fatg a siu fegl Urs. Tenend plitost tschelau da ver gust da publicar vonzeivi sias enconuschientschas. La sort ei magari malguessa. Sia Benedicta ha entschiet ad ir a pusignond. Entochen il di ch'ella ei vegnida malmalsauna ed ha stuiu suttacumber. Dil rolli anora ha la Benedicta bein aunc fatg il pusseivel, mo ella ei stada impedita. Naven da quei mument ha il Francestg Berther entschiet a veser aunc meglier. Il tractament ed il quitaun per sia dunna! La mumma dueigi saver vegnir tgirada a casa - dad el e dils ses. Enten prender ina tala decisiun ei il consort e bab carschiu da detschiert. Igl ei stau sia grondezia.

Pongir: Francestg Berther ei staus rentaus vid siu dacasa. Las uras libras e las ezzas da stgir eis el sefatschentaun da metter giu ses screts. Cun passa 80 onns ha el ediu buca meins che quater cudischs, dus en romontsch e dus en tudestg - enteifer bi e bein siat onns. Quei ei ina bravura.

Igl emprem cudisch secloma: «Rueras - Ses avdents e sias casas denter 1750 ed oz. » Cun in engaschament nundetg descriva el las avdonzas e lur glieud. Ins schess ch'el hagi la parentella entira si per la detta. Ual en quella direcziun ha Francestg Berther ina memoria fenomenala. Biaras e bialas fotografias embelleschan l'ediziun. Ed in cudisch cun maletgs ha pil pli sia tila. En mintga cass ei la publicaziun stada vendida sil plum. E mo dus onns silsunter cumpara l'auter cudisch: «Tujetsch e ses originals e lur raquens.» Danovamein in triep maletgs! L'originalitad ei stada ina da sias fermezas. Il cudisch selegia vieti tgunsch. Ed ei tucca meinsvart da litgar ils levzs.

Igl ei stau in pign ughetg dad edir in cudisch en tudestg: «Der Kälberhirt von Val Milar. » Felici Berther-Estermann da Rueras/Sursee ha fatg la redacziun. Era cheu ston ins mintgaton rir dallas bialas regurdonzas ed oravontut dallas anecdotes ch'ein rugaladas cun gust. Il quart cudisch ei ina translaziun dils temas da vivon.

Sco detg - Francestg Berther ha saviu raquintar historias cun lur detgas e legendas sco mo paucs. El cun siu stil convenziunal ed aparti. Entras el ei la vischnaunca vegnida in bien ton pli reha.

Meinsvart tratgan ins ch'el vessi era saviu scriver da sias experienzas da pli tard, verdeivlamein e nuotatonmeins ficziuns. El cun sia fantasia sco ina entira muntogna.

Cura che la vesida ha entschiet a disdir ed igl ei iu da mal en mender, ha Francestg Berther auncallura retratg sia dimora en la Casa Sogn Vigeli a Sedrun. Sia seremessa ei da num.

Enten dar adia ha Francestg Berther priu mei pil maun ed ha fatg l'enzenna. Sco sche jeu s'udess culs agens.

Sur Giusep Berther, Dieni/Tujetsch (1916-2004)

da sur Martin Bearth, Mustér/Medel

CR 2006, pag. 425



Cu Jesus ha plidau sur da Gion Battesta ha el detg: «El ei quel che prepara la via pil Segner» (Mt. 11,10). Secapescha che Gion Battesta ha giu ina missiun tut speciala. El ei staus la vusch el desiart che ha proclamau e preparau la via al Messias. El ei staus il profet che ha fatg la punt naven dil vegl Israel tiel niev Israel, tiel niev pievel da Diu. El ha astgau veser il Messias da fatscha en fatscha.

E tuttina vein nus cartents e cartentas dil niev Israel da menar vinavon la missiun da Gion Battesta. Nus vein da preparar la via al Messias - Salvader - ier ed oz e damaun. Als ordinai e spirituals ei quella missiun surdada per aschidadir «ex officio», sco pensum e missiun da lur veta.

Sur Giusep Berther ha priu fetg serius quei pensum. El ei era buc untgius, cu igl ei stau enqualga grev da dar vinavon la buna nova ed era buca, cu el ei staus persuls sco en in desiart. Cu el fuva perschuadius d'enzatgei, schev'el era quei ella publicitad ni era privatamein.

Derivonza

Naschius ei sur Giusep Berther ils 4 da fevver 1916 a Dieni, la pintga ucliva dadens Rueras, enta Tujetsch. Da lezzas uras fuva Dieni plitost in bein puril cun ina casa sur il stradun ed ina giusut ed aunc in per baghetgs agricols. Crescher si en in tal liug en ina certa izolaziun, mo era independenza e suveranità, quei formescha e dat tempra. Las ragischs, ord las qualas ina plonta crescha, ein da gronda muntada.

La casa dils Berthers da Dieni ei stada ina casa da spirituals. Ord quella casa ein vegni: sur Tumaisch Berther (1853-1931) e Pader Baseli Berther OSB (1858-1931). Els fuvan frars dil tat dils frars sur Giusep Berther (1916-2004) e sur Tumaisch Berther (n. 1927).

Sur Giusep ei carschius si en ina gronda famiglia. Ils geniturs, Baseli e Mariuschla Berther-Gieriet, han giu 14 affons. Treis ein morts cuort suenter la naschienscha. Il bab Baseli fuva il pur suveran cun tgierp ed olma. Dasperas eis el staus president dalla vischnaunca da Tujetsch, deputau el Cussegl grond ed ei era s'engaschaus per la caplania da Rueras e pil scolaresser da Tujetsch. La mumma Mariuschla fuva la dunna quieta, plein quitau e fin sentiment per ses affons e pils basegns dil singul carstgaun.

Sia scolaziun ha sur Giusep Berther retschiert ellas scolas primaras e secundaras da vischnaunca, dus onns gimnasi en claustra a Muster e tschun onns en claustra a Nossadunnaun. Leu ha el fatg la matura cun la megliera nota en tut ils roms. Suenter la scolaziun teologica el Seminari da s. Leci a Cuera vegn sur Giusep Berther ordinaus digl uestg Cristianus Caminada ils 4 da fenadur 1943. Sia emprema s. messa festivescha el a Sedrun per la fiasta da Nossadunna dil Scapulier.

En pastoraziun

Lu suondan ils onns da lavur pastoral: Da 1944-1950 vicari ella pleiv dil Bien Pastur el marcau da Turitg, 1950-1963 plevon a Razen, 1963-1968 plevon a Ruschein e Ladir, 1968-1978 plevon a Lumbrein, 1978-1985 plevon a Medel/Lucmagn. Cun 69 onns seretila sur Giusep Berther digl uffeci da plevon. El serenda a Bombinasco el Tessin sco spiritual en ina pensiun che soras da s. Antoni da Soloturn meinan per fami glias, sco era per uniuns e gruppas, per scolaziun ni reconvalescenza. Immediat empren el il lungatg talian. El sesenta dacasa el Tessin sco strusch enzanua ed anfla era spontanamein contact ton cun ils cussadents ella pensiun sco cul pievel tessines e culs plevons dil contuorn. El veva il dun dil contact spontan e direct.

Mia emprema sentupada cun sur Giusep Berther va anavos sils emprems onns da mia pastoraziun. Jeu fuvel plevon a Sur, Mulegns e Marmorera. Sur Giusep Berther era plevon a Razen. El ei sepurschius da vegnir la stad per in per jamnas en mias pleivs e jeu sappi vegnir a Razen. Quei vein nus lu fatg. Dapi lu essan nus s'entupai savens per discussiuns e per spassegiadas en nossa tiara muntagnarda. El fuva cudischius en massa spartas dalla veta e saveva discussiunar e s'inflammar per da tuttas uisas temas. El fuva critics e directs, mo era raschuneivels e fetg aviarts. Sin nossas spassegiadas raquintava el

bugen da sias experienzas ella veta ed ella lavur, da sulegl ed umbriva. Mo tuttenina voleva el far oraziun. E lu viandavan nus vinavon, urond ensemen ils misteris dil rusari.

Sur Giusep Berther ei buc ius mo corporalmein sur bia cuolms e tras bia vals. Ei ha era tuccau ad el dad ir psichicamein sur cuolms e tras stgiras vals. Schegie ch'el fuva en sesez in carstgaun cun bia humor e spir stuccas, fuv'el tuttenina giu ella stgira val. Sedisch gadas ha el stuiiu far ina cura per vegnir libers da sias grevadetgnas e sia profunda tristezza. El scheva lu: «Jeu sesentel sco en ina perschun.» Savens sun jeu sesmarvigliaus, co el vegneva lu plaunsiu siado dalla val e semetteva puspei vid sia lavur. Plaun a plaun turnava il sulegl puspei en sia veta. Oravontut l'oraziun che era per el il paun da mintgadi e sia nunballuccabla fidonza en Diu fuvan las petgas, vid las qualas el seteneva fermamein.

Serasontga

Ussa dapi siat onns fuva sur Giusep Berther en Casa s. Vigeli a Sedrun. En siu patertgar entupav'ins el savens gia vi sur mar. El scheva lu: «Marveglias hai jeu, co quei ei.» Sur Giusep Berther fuva in carstgaun da marveglias, v.d. el leva saver, co ei stat propi e saveva far smarvegls.

Savens urav'el il davos temps tut dad ault: «Segner, tiu reginavel vegni.» Ils 6 da december 2004 ei il reginavel da Diu vegnius definitivamein tier sur Giusep Berther. Jeu supponel che a sias biaras damondas ha el ussa survegniu risposta. Avon onns manegiava el era ch'ei stuessi dar enta parvis ina pista da skis e ch'el stuessi era saver fimar mintgaton ina pipa-tubac. «Marveglias hai jeu, co quei ei», scheva el. Per nus pelegrens eis ei aunc uss in misteri da cardientscha.